

終

社121
673
部大:58



文獻通考卷第二百二十

鄱陽馬端臨貴與著



經籍考四十七

子五行 占筮 形法

廣古今五行志三十卷

鼂氏曰竇滂撰唐志有其目未詳何人纂五行變異敘其徵應蓋為洪範之學者自古術數之學多矣言五行則本洪範言卜筮則本周易近時兩者之學殆絕而最盛於世者葬書相術五星祿命六壬遁甲星禽而已然六壬之類足以推一時吉凶

星禽五星祿命相術之類足以推一身之吉凶葬書之類足以推一家之吉凶遁甲之類足以推一國之吉凶其所知若有遠近之異而或中或否不可盡信則一也

遁甲萬一訣一卷

鼂氏曰題云唐李靖所纂黃帝書按遁甲之書見於隋志凡十三家則其學之來亦不在近世矣以休生傷杜景死驚開八門推國家之吉凶通其學者以爲有驗未之嘗試也

遁甲經一卷

鼂氏曰唐胡乾撰李氏書目亦云九天元女術推九星八門三奇六儀之法

景祐遁甲玉函符應經二卷

陳氏曰司天春官正楊惟德撰御製序

景祐太一福應集要十卷

陳氏曰楊惟德撰御製序末題紹興元年嵩陽潛士魏郡劉箕其積算自建炎三年己酉推之者其所附益也九宮八門與遁甲相表裏字多訛未有他本可校

陰陽二遁圖局一卷并雜訣

三元立成圖局二卷 遁甲八門機要一卷 太乙淘
金歌一卷

陳氏曰已上四種皆不著撰著人名氏得之盱江
吳炎

遁甲選時圖二卷

陳氏曰紹興府所刻本亦無名氏

秤星經三卷

晁氏曰不著撰人以日月五星羅睺計都紫氣月
孛十一曜演十二宮宿度以推人貴賤壽夭休咎
不知其術之所起或云天竺梵學也按洪範曰歲

月日時無易百穀用成又用明俊民用章家用平
康月之從星則以風雨洽州鳩曰武王伐殷歲在
鶉火月在天駟一曰在析木之津辰在斗柄星在
天竈以此言之五星之術其來尚矣蓋可以占國
則可以占事可以占事則可以占人也然術家用
日月五星以占吉凶又加以交初交中之神紫氣
月孛之宿初中者交食之會亦可以意求惟氣孛
無稽而術家獨以爲效且曰土木之餘氣五星之
行土木最遲而爲吉凶者久故有餘氣云

周易十二論一卷

乾隆十二年校刊

經籍四十七

三

文獻通考卷三百二
三
鼂氏曰未詳撰人論日月五星直年以占吉凶

珞瑜子三命一卷

鼂氏曰李獻臣云珞瑜者取珞珞如玉碌碌如石之義推人生休咎否泰之法箕子曰五行水火金木土禹曰辛壬癸甲則甲子五行之名蓋起於堯舜三代之時矣鄭氏釋天命之謂性曰謂木神則仁金神則義之類又釋我辰安在曰謂六物之吉凶此以五行甲子推知休咎否泰於其傳者也呂才稱起於司馬季主及王充其言淺哉然才所詆建祿背祿三刑劫殺建學空亡勾絞六害驛馬之

類皆今世三命之術也亦在才之前矣由是觀之視他術淵源獨遠且小運之法本於說文已字之訓空亡之說本於史記孤虛之術多有所自來故精於其學者巧發奇中最多

陳氏曰此書祿命家以爲本經其言鄙閭巷賣卜人所爲也

珞瑜子疏五卷

鼂氏曰皇朝李全東方明撰

李虛中命書三卷

鼂氏曰唐李虛中撰虛中字常容姓纂云冲之八

代孫學最深於五行書壽夭貴賤利不利輒先處其年時百不失一韓愈言冲爲虛中十一世祖誤也

河圖天運二賦一卷

鼂氏曰不著撰人論天地二運蓋三命書也崇文目以爲卜筮類

壺中賦一卷

陳氏曰稱紫雲溪壺中子莫知何人

源髓歌六卷 後集三卷

陳氏曰唐沈芝撰後集妄也

太乙命訣一卷

陳氏曰稱袁天綱妄人假託

五命祕訣一卷

鼂氏曰皇朝林開撰三命之術年月日支干也加以時胎故曰五命

鮮鶚經十卷

鼂氏曰未詳撰人凡十門六十二章以星禽推知人之吉凶言其性情嗜好爲尤驗說者謂本神仙之訣也故此書載於道藏李邕鄆云羅浮山逍遙子撰

紫堂訣三卷

鼂氏曰紫堂先生撰未詳何代人著紫垣十二星至隱曜總三百六十位分二十八舍附之以五星配十二辰以推人命之吉凶

五星命書一卷

陳氏曰不著名氏其歌訣頗詳然未必驗也

五星三命指南十四卷

陳氏曰亦不知名氏大抵書坊售利求俗師爲之
聿斯歌一卷

陳氏曰青羅布衣王希明撰不知何人

靈臺三十六歌一卷

陳氏曰題稱武平先生所撰然亦不知其爲何代人

五星六曜約法一卷 洞微歌一卷 紫宙經一卷

陳氏曰以上三種皆無撰著名氏亦莫考其所自出

四門經一卷

陳氏曰唐待詔陳周輔撰

青羅立成歷一卷

陳氏曰司天監朱奉奏據其歷起貞元十年甲戌

入歷至今乾寧四年丁巳則是唐末人

羅計二隱曜立成歷一卷

陳氏曰稱太中大夫曹士薦亦莫知何人但二起
元和元年入歷

諸家五星書一卷

陳氏曰雜錄五星祿命之說前數家亦多在焉

遁甲八門命訣一卷

陳氏曰不知名氏

信齋百中經一卷

陳氏曰不著名氏安慶府本術士言最善

怡齋百中經一卷

陳氏曰東陽術士曹東野自言今世言五星者皆
用唐顯慶歷法更本朝前後無慮十餘變而百
中經猶守舊安得不差乃用見行歷法推算其說
如此未知能質也

五行精紀三十四卷

陳氏曰清江鄉貢進士廖中撰周益公爲之序集
諸家三命說

三辰通載三十四卷

陳氏曰嘉禾錢如璧編集五星命術

廣濟陰陽百忌歷二卷

陳氏曰稱唐呂才撰有序按才序陰陽書其二篇見於本傳曰祿命曰卜宅曰葬盡掃世俗拘滯之論安得復有此歷本初固已假託後人附益尤不經

三歷會同十卷

陳氏曰不知作者集百忌總聖集正三書

萬歷會同三十卷

陳氏曰陳從古撰以前書推廣之書坊售利之具也

彈冠必用一卷

陳氏曰周謂撰專爲宦游擇日設

三歷撮要一卷

陳氏曰無名氏又一本名擇日撮要歷大略皆同建安徐清叟真翁云其尊人尚書公應龍所輯不欲著名

陰陽備用十二卷

陳氏曰通判舒州新安胡舜甲汝嘉撰此書本爲地理形法而諸家選對日法要皆在焉故附於此右五行

焦氏易林十六卷

鼂氏曰漢天水焦延壽傳易於孟喜此其所著書也費直題其前曰六十四卦變又有唐淪王序所書每卦變六十四總四千九十六首皆爲韻語與左氏傳載鳳凰於飛和鳴鏘鏘漢書所載大橫庚庚子爲天王之語絕相類豈古之卜者各有此等書邪

石林葉氏曰吾家有焦貢易林京房易二書大抵皆卜筮陰陽氣候之言不復更及易道考之班固儒林傳漢初傳易大抵皆本之田何而焦貢獨得

隱士之說以授京房貢嘗從孟喜問易會喜死房卽以其學出孟氏其徒翟牧白生不肯皆曰非也然孟喜雖授學田王孫至其候陰陽災變言田生死時枕喜膝獨傳喜其實妄也故梁邱賀辨以爲田生絕施讐手中時喜歸東海無此事則二氏書其源流固無所本縱焦貢書出孟氏固謬矣如趙賓說箕子明夷爲箕子者萬物方荦茲也云受於喜爲喜爲名之則喜乃妄人而已

陳氏曰又名大易通變唐會昌景寅越五雲谿王俞序凡四千九十六卦其辭假出於經史其意雅

通於神祇蓋一卦可以變六十四也舊見沙隨程
迥所記南渡諸人以易林筮國事多奇驗求之累
年寶慶丁亥始得之莆田皆韻語古雅頗類左氏
所載繇辭或時援引古事間嘗筮之亦驗頗恨多
脫誤嘉熙庚子從湖守王寺丞侑借本兩相校十
得八九其中亦多重復或諸卦數爻共一繇莫可
考也

八神筮法二卷

鼂氏日以八卦世分六十四卦每卦首必云子夏
曰論易筮之吉凶

靈基經二卷

鼂氏曰漢東方朔撰又云張良劉安未知孰是晉
顏幼明宋何承天注有唐李遠叙歸來子以爲黃
石公書豈謂以授良者邪按南史載客從南來遺
我良財寶貨珠璣金盃玉盃之繇則古之遺書也
明矣凡百二十卦皆有繇辭

靈龜經一卷

鼂氏曰史蘇撰論龜兆之吉凶崇文目二卷

易傳積算法雜占條例一卷

陳氏曰漢京房撰詳已見易類世所傳京氏遺學

不過如此而已今世卜者世應飛伏納甲之類皆
出京氏

周易版詞一卷

陳氏曰不知名氏當是漢魏以前人所爲其間官
名皆東京制也

周易元悟一卷

陳氏曰題李淳風撰

火珠林一卷

陳氏曰無名氏今賣卜者擲錢占卦盡用此書

撰著古法一卷

陳氏曰開封鄭克武子撰

著卦辯疑序三卷

陳氏曰郭雍撰自序略言學者相傳謂九爲老陽
七爲少陽六爲老陰八爲少陰及觀乾爻稱九坤
爻稱六則九六爲陰陽蓋無疑也而六子皆稱九
六不言七八則少陰少陽未有所據及考乾坤之
策曰乾之策二百一十有六坤之策百四十有四
六之一則乾爻得三十六坤爻得二十四是則老
陰老陽之數也又考二篇之策陽爻百九十有二
以三十六乘之積六千九百十有二陰爻百九十

有二以二十四乘之積四千六百八合之爲萬有
一千五百二十則二篇之策亦皆老陰老陽之數
也而少陰少陽之數又無所見再置陽爻百九十
有二以少陽二十八乘之積五千三百七十六再
置陰爻百九十有一以少陰三十二乘之積六千
一百四十四合之亦爲萬有一千五百二十以是
知少陰少陽之數隱於老陰老陽之中如是則七
九皆爲陽六八皆爲陰其畫爲奇爲耦皆同聖人
畫卦初未必以陰陽老少爲異然卜史之家欲取
動爻之後卦故分別老少之象與聖人畫卦之道

已不同矣然七九爲陽六八爲陰蓋謂陰陽各有
二道與說卦言立天之道曰陰與陽立地之道曰
柔與剛其義皆同是道也以聖人不明載之繫辭
後世紛紛互相矛盾至有大失聖人之意者大率
多主下史之論不知所謂策數遂妄爲臆說也

朱子語錄曰揲著雖是一小事自孔子來千五百
年人都理會不得唐時人說得雖有病痛大體理
會得是近來說得大乖自郭子和始奇者揲之餘
爲奇劫者歸其餘劫二指之中今子和反以掛一
爲奇而以揲之餘爲劫又不用老少只用三十六

三十二二十八二十四不知爲策數以爲聖賢從來只說陰陽不曾說老少不知他既無老少則七八九六皆無用又何以爲卦又曰龜爲卜策爲筮策是餘數謂之策他只是胡亂說策字或問他既如此說則再扞而後卦之說何如曰他以第一揲扞爲扞第二第三揲不掛爲扞第四揲又掛然如此則無五年再閏如某已前排真个是五年再閏聖人下字皆有義理掛者挂也扞者勒於一指之中也

常陽經一卷

鼂氏曰崇文目題曰黃帝式用蓋六壬占卜術也
六壬要訣一卷

鼂氏曰未詳何人撰隋志載六壬之書兩種金鑿密記及五代史記頗言其驗今世龜筮道息而此術獨行

六壬課鈴一卷

鼂氏曰未詳何人所纂以六十甲子加十二時成七百二十三課三傳入神以占吉凶

玉關歌一卷

六壬鼂氏曰不題撰人六壬課訣也

六壬翠羽歌一卷

陳氏曰後唐長興中僧令岑撰錯誤極多未有他本可校

六壬洞微賦一卷

陳氏曰不知名氏瞽卜劉松年所傳

京氏參同契律歷志一卷

陳氏曰虞翻注專言占象而不可盡通字亦多誤未有別本校

京氏易式一卷

陳氏曰鼂說之以道撰

占燈法一卷 觀燈法一卷

鼂氏曰唐李淳風撰崇文總目亦有之

右占筮

八五經一卷

鼂氏曰序云黃帝書八五謂八卦五行雖後人依託而其辭亦馴雅相墓書也呂才葬篇以六說詰其不驗且云世人之爲葬巫所欺忘擗踊荼毒以期徼幸由是相塋隴希官爵擇時日規財利誠哉是言也

陳氏曰序稱大將軍記室郭璞後序言余受郭公

囊書數篇此居一公戒以祕之丞相王公盡索余書余以公言告之得免末稱太興元年六月蓋晉元帝時王公謂導也然皆依託耳其書爲相墓作狐首經一卷

陳氏曰不著名氏稱郭景純序亦依託也胡汝嘉始序而傳之其文亦雅馴言頗有理

續葬書一卷

陳氏曰稱郭景純撰鄙俗依託

青囊補注三卷

鼂氏曰郭璞撰世傳葬書之學皆云無出郭璞之

右者今盛行皆璞書也按璞傳載葬母事世傳蓋不誣矣璞未幾爲王敦所殺若謂禍福皆係於葬則璞不應擇凶地以取禍若謂禍福有定數或他有以致之則葬地不必擇矣嗚呼璞自用其術尚如此况後遵其遺書者乎

撥沙經一卷

鼂氏曰唐呂才撰地理書畫山水之形成圖蓋依託者

青囊本旨一卷

鼂氏曰不記撰人演郭璞相墓青囊經也

洞林別訣一卷 尋龍入式一卷

鼂氏曰江南范越鳳集郭璞所記諸家地理書得失爲此書二十四篇并司空班尋龍入式歌附

陳氏曰又名洞林別訣范越鳳相傳縉雲人家於將樂

地理少一卷

陳氏曰稱李淳風亦未必然

會元經二十四卷

鼂氏曰孫季邕撰未詳何代人集諸家相地書及其鄙陋無驗者成是書

金鎖正要一卷

元談經一卷

錦囊遺錄一卷

五

行統例一卷

鼂氏曰四書皆地理書也

五音地理新書二十卷

鼂氏曰唐僧一行撰以人姓五音驗八山三十八將吉凶之方其學今世不行

地理口訣一卷

陳氏曰不知何人所集曰楊筠松曾楊乙黃禪師左仙朱仙桃范越鳳劉公賴太素張師姑王吉凡十家

楊公遺訣曜金歌并三十六圖象一卷

陳氏曰楊卽筠松也又號楊救貧

神龍鬼砂一卷 羅星妙論一卷

陳氏曰皆不知作者

九星賦一卷

陳氏曰題范公

陰陽精義二十篇

朱伯起撰水心序伯起從鄭公景望學而與景元爲友酷嗜地理談山如啖蔗浮海葬妻大芙蓉云後百年當驗著書二十篇論原起乘止尤詳二鄭

因是喜陰陽家余嘗怪蘇公子瞻居陽羨而葬嵩山一身豈能應四方山水之求近時朱公元晦聽蔡季通預卜壽藏門人裹糧行紼六日始至乃知好奇者固通人大儒之常患也

龍髓經一卷 疑龍經一卷 辯龍經一卷 龍髓別

旨一卷 九星祖局圖一卷 五星龍祖一卷 二十

八禽星圖一卷

陳氏曰以上七種皆無名氏并前諸家多吳炎錄以見遺江西有風水之學往往人皆道之

三十二家相書三卷

鼂氏曰或集許負以下三十二家書成此編

月波洞中記一卷

鼂氏曰序稱唐任逍遙得之於太白山月波洞石壁上凡九篇相形術也崇文總目置之五行類

雜相書一卷

陳氏曰凡三十二種又有拾遺亦吳晦父所錄

成和子觀妙經一卷

陳氏曰不著名氏

希夷先生龜鑑一卷

陳氏曰逸人亳社陳搏圖南撰劉康國注館閣書

目作人倫風鑒

袖中記一卷

鼂氏曰皇朝李唐濬撰辨人形色知人壽夭吉凶

羣書古鑒一卷

鼂氏曰未詳撰者姓名熙寧間集書史相術驗者

諸家相書五卷

陳氏曰知莆田縣昭武黃庚毅夫撰集

玉管神照一卷

陳氏曰無名氏

相馬經

鼂氏曰伯樂撰

集馬相書一卷

鼂氏曰光祿少卿孫珪撰

相牛經一卷

鼂氏曰序曰甯戚傳之百里奚漢世河西薛公得其書以相牛千百不失其一至魏世高堂生又傳晉宣帝其後祕之細字薛公注也

相鶴經一卷

鼂氏曰題曰浮邱公撰其傳云浮邱公傳於王子晉後崔文子學道於子晉得其文藏於嵩山之石

室淮南公採藥得之乃傳於世

相貝經一卷

陳氏曰不知作者

師曠禽經一卷

陳氏曰稱張華注

右形法

文獻通考卷第二百二十

文獻通考卷第二百二十一

鄱陽馬端臨貴與著

經籍考四十八

子兵書

漢藝文志兵家者流蓋出古司馬之職王官之武備也洪範八政八曰師孔子曰爲國者足食足兵以不教民戰是謂棄之明兵之重也湯武受命以師克亂而濟百姓動之以仁義行之以禮讓司馬法是其遺事也自春秋至於戰國出奇設伏變詐之兵並作漢興張良韓信序次兵法凡百八十二家刪取要用定

著三十五家諸呂用事而盜取之武帝時軍政楊璞
据摭遺逸紀奏兵錄猶未能備至於孝成命任宏論
次兵書為四種

漢志兵權謀十三家二百五十九篇

省伊尹太公管子孫卿鶡冠子蘇子

蒯通陸賈淮南王二百五十九種出司馬法入禮也其權謀者以正守國以奇用兵先計而後戰兼形勢包陰陽用技巧也

漢志兵形勢十一家九十二篇圖十八卷

形勢者雷動風舉後發而

先至離合背鄉變化無常以輕疾制敵者也

漢志陰陽十六家二百四十九篇圖十卷

陰陽順時而發推刑德隨

斗擊因五行相勝假鬼神而為助也

右漢志兵技考十三家百九十九篇

省墨子重入就之鞠也技

巧者習手足便器械積機關以立攻守之勝者也凡兵書五十三家七百九十篇圖四十三卷

容齋洪氏隨筆曰漢成帝命任宏論次其書為四種其權謀中有韓信三篇形勢中有項王一篇前後藝文志載之且云漢興張良韓信序次兵法凡百八十二家刪取要用定著三十五家諸呂盜取之項韓雖不得其死而遺書可傳於後者漢世不廢今不可復見矣

隋志一百三十三部五百一十二卷

唐志二十三家六十部三百一十九卷

失姓名十四家李筌以下不著

錄二十五家一百六十三卷

宋三朝志一百八十二部五百五十三卷

宋兩朝志三十二部一百二十七卷

宋四朝志九十七部八百二十八卷

宋中興志九十二家一百單七部一千七十四卷

六韜六卷

鼂氏曰周呂望撰按漢藝文志無此書梁隋唐始著錄分文武龍虎豹犬六目兵家權謀之書也元豐中以六韜孫子吳子司馬法黃石公三略尉繚子李衛公問對頒行武學今習之號七書云按兵

法漢成帝常命任宏分權謀形勢陰陽技巧為四種今又有卜筮政刑之說蓋在四種之外矣

高氏子略曰詩曰維師尚父時維鷹揚涼彼武王肆伐大商會朝清明鄭康成稱其天期已至兵甲之疆師卒之武故今伐商合兵以清明也牧誓曰時甲子昧爽王朝至於商郊牧野與詩合也武王之問太公曰何以知人心王時寢疾太公負而起之曰行迫矣勉之武王乃駕鷲冥之車周旦為之

御至於孟津大黃參連弩大才扶胥車戰具飛鳧赤莖

白羽以電影青莖赤羽以銅為首副方頭鐵鎚重八

乾隆十二年校刊

經籍四十八

斤一名行馬廣二丈渡溝飛橋廣五丈轉關鹿盧鷹爪方

凶鐵把柄長七尺天陣日月斗杓杓一左一右地陣邱陵

水泉有左右人陣車馬文武積楹臨衝攻具雲樓飛樓視城

也武衡大櫓三軍所需雲火萬炬火具吹鳴箎審此則康

成所曰兵甲之彊師卒之武為可考歟亦詩所謂

檀車煌煌駟騶彭彭者也又考諸武王曰殷可伐

乎太公曰天與不取反受其咎武王又曰諸侯已

至士民何如太公曰大道無親何急於元士武王

又曰民吏未安賢者未親何如太公曰無故無親

如天如地其言若有合於書者詩之上章曰保右

命爾變伐大商上帝臨女無貳爾心此之謂也

周氏涉筆曰謂太公為兵家之祖自漢人已然本

無所稽僅以陰符有託而云爾太公遇文王事尚

未足信况談兵哉周詩鷹揚外無他語周公曰惟

文王尚克修和我有夏亦惟有若虢叔有若閔天

有若泰顛有若南宮括武王惟茲四人尚廸有祿

後暨武王誕將天威咸劉厥敵惟茲四人昭武王

惟冒丕單稱德向使太公主柄伐商身為大將周

公其遺之乎六韜不知出何時其屑屑共議以家

取國以國取天下殆似丹徒布衣太原宮監所經

營者史記載君臣各把鉞斷首懸旗以後人臆記
非實也歸賂免囚好事爲之而此書因著文伐十
二節陰賂左右輔其淫樂養其亂臣與韓非所云
納費仲奉玉版并爲一論蓋文武周召之一厄也
管子書載湯結女華以爲陰事曲逆以爲陽戰國
諸子窺測古聖妄誕率類此太公舉賢尚功周公
知其有篡弑之臣亦是後人妄以見事附合而諸
子因記殺華士謂周公馳往救之踈謬可笑此書
有上賢篇則六賊七害指抗志高節輕爵位賤有
司語無爲言無欲虛論高議窮居靜處條居大半
全與暴亂同科按武王既定天下其詩曰日靖四
方其書曰無有作惡當丕單稱德之世而紛然懸
賞罰募功名不知將何出也此書並緣吳起漁獵
其詞而綴緝以近代軍政之浮談淺駁無可施用
蓋吳起武侯真答問也故問者當其形對者應其
實至於料六國形勢所當出百代之下猶可想像
而此書問答徒效之也故務廣不務精語脉皆不
相應讀者宜熟察也

陳氏曰其辭鄙俚世俗依託也

水心葉氏曰自龍韜以後四十三篇條畫變故預

設方禦皆爲兵者所當講習孫子之論至深不可測而此四十三篇繁悉備舉似爲孫子義疏也其書言避正殿乃戰國後事固當後於孫子論將有十過近於五危戰車十死戰騎十敗與行軍九地相出入其勵軍言禮將力將一欲練士各聚卒教戰成三軍又本於吳起然則孫吳固兵家所師用至莊周亦稱九徵則真以爲太公所言矣然周嫚侮爲方術者而不悟六韜之非僞何也蓋當時學術無統諸子或妄相詆訾或偶相崇出於率爾豈足據哉

司馬法三卷

鼂氏曰齊司馬穰苴撰威王使大夫追論古者司馬兵法而附穰苴於其中因號司馬兵法司馬遷謂其書閎廓深遠雖三代征伐未能竟其義如其文近亦少褒矣穰苴爲區區小國行師何暇及司馬兵法之揖讓乎

陳后山擬御試武舉策曰臣聞齊威王使其大夫追論古者司馬兵法附以先齊大司馬田穰苴之說號曰司馬穰苴兵法夫所謂古者司馬兵法周之政典也所謂穰苴兵法太史遷之所論今博士

弟子之所誦說者也昔周公作政典司馬守之以
佐天子平邦國而正百官均萬民故征伐出於天
子及上廢其典下失其職而周衰矣故征伐出於
諸侯典之用舍興壞係焉遷徒見七國楚漢之戰
以詐勝而身固未嘗行道也遂以仁義爲虛名而
疑三代以文具可謂不學矣史稱遷博極羣書而
其論如此所謂雖多奚爲者也臣謹按傳記所載
司馬法之文今書皆無之則亦非齊之全書也然
其書曰禮與法表裏文與武左右又曰殺人以安
人殺之可也攻其國愛其民攻之可也以戰去戰

雖戰可也又曰夏冬不興師所以兼愛民此先王
之政何所難乎至其說曰擊其疑加其卒致其屈
襲其規此穰苴之所知也漢之所行遷之所見而
謂先王爲之乎

魏武注孫子一卷

鼂氏曰吳孫武撰魏武帝注按漢藝文志孫子兵
法八十二篇今魏武所注止十三篇杜牧以爲武
書數十萬言魏武削其繁剩筆其精粹成此書云
其序略曰吾讀兵書戰策多矣武所著深矣

水心葉氏曰按司馬遷稱孫子十三篇兩言之而

班固志藝文乃言孫武子兵法八十二篇又吳起四十八篇而今吳起六篇而已又今中庸一篇而志稱四十九篇豈昔所謂篇者特章次之比非今粹書也然遷時已稱十三篇而劉歆班固在其後反著八十二篇以火攻用間考之疑孫子亦有未盡之書然此爲文字多少其不存者自不足論遷載孫武齊人而用於吳在闔閭時破楚入郢爲大將按左氏無孫武他書所有左氏不必盡有然穎考叔曹劌燭之武鱒設諸之流微賤暴用事左氏未嘗遺而武功名章灼如此乃更闕又同時伍員

宰嚭一一銓次乃獨不及武邪詳味孫子與管子六韜越語相出入春秋末戰國初山林處士所爲其言得用於吳者其徒夸大之說也自周之盛至春秋凡將兵者必與聞國政未有特將於外者六國時此制始改吳雖蠻夷而孫武爲大將乃不爲命卿而左氏無傳焉可乎故凡謂穰苴孫武者皆辯士妄相標指非事實其言闔閭試以婦人尤爲奇險不足信

高氏子略曰周衰制隳法蕩政不克綱強弱潰凌一趨於武侈兵圖霸干戈相尋甚可畏也其間謀

師行帥命意立制猶知篤禮信尚訓齊庶幾三代
仁義之萬一焉耳殊未至於毒也兵流於毒始於
孫武乎武稱雄於言兵徃徃舍正而鑿奇背義而
依詐凡其言反覆其變無常智術相高氣驅力奪
故詩書所述韜匱所傳至此皆索然無遺澤矣先
儒曰無以學術殺天下後世是猶言學者也吳越
交兵勝負未決武居其間豈無所以爲強吳勝越
者二十年間闔閭旣以戰死夫差旋喪其國方是
時武之言兵亦知爲吳計而已成敗興亡易如反
掌固無待於殺天下後世兵其可以智用歟

陳氏曰世之言兵者祖孫武然孫武事吳闔閭而
不見於左傳不知果何時人也

李筌注孫子三卷

鼂氏曰唐李筌注以魏武所解多誤約歷代史依
遁甲注成三卷

杜牧注孫子三卷

鼂氏曰唐杜牧牧之注牧以武書大略用仁義使
機權曹公所注解十不釋一蓋惜其所得自爲新
書爾因備注之世謂牧慨然最喜論兵欲試而不
得者其學能道春秋戰國時事甚博而詳知兵者

有取焉

陳皞注孫子三卷

鼂氏曰唐陳皞撰皞以曹公注隱微杜牧注闊疎重爲之注云

紀燮注孫子三卷

鼂氏曰唐紀燮集唐孟氏賈林杜佑三家所解

梅聖俞注孫子三卷

鼂氏曰皇朝梅堯臣聖俞注歐公爲之序

歐陽氏序曰世所傳孫武十三篇多用曹公杜牧陳皞注號三家孫子余頃與撰四庫書序所見孫

子注者尤多

一有至二十餘家五字

武之書本於兵兵之術

非一而以不窮爲奇宜其說者之多也凡人之用

智有短長其設施各異故或膠其說於偏見然無

出所謂三家者三家之注皞最後其說時時攻牧

之短牧亦慨然最喜論兵欲試而不得者其學能

道春秋戰國時事甚博而詳然前世言善用兵稱

曹公嘗與董呂諸袁角其力而勝之遂與吳蜀分

漢而王傳言魏之諸將出兵千里

一有公字

每坐計勝

敗授其成算諸將用之十不失一一有違者兵輒

敗北故魏世用兵悉以新書從事其精於兵也如

此牧謂曹公於注孫子尤略蓋惜其所得自爲一書是曹公悉得武之術也然武嘗以其術干吳王闔閭用之西破楚北服齊晉而霸諸侯夫使武自用其書止於疆霸及曹公用之然亦終不能滅吳蜀豈武之術盡於此乎抑用之不極其能也後之學者徒見其書又各牽於已見是以注者雖多而少當也獨吾友聖俞不然常評武之書曰此戰國相傾之說也三代王者之師司馬九伐之法武不及然亦愛其文略而意深其行師用兵料敵制勝亦皆有法其言甚有次序而注者汨之或失其意

乃自爲注凡膠於偏見者皆挾

一作挑

去傳以已意

而發之然後武之說不汨而明吾知此書當與三家並傳而後世取其說者往往於吾聖俞多焉聖俞爲人謹質温恭一有仁厚而明四字衣冠進趨眇然儒者也後世之視其書者與太史公疑張子房爲壯夫何異

朱子語錄曰歐公大段推許梅聖俞所注孫子看得來如何得似杜牧注底好

王皙注孫子三卷

鼂氏曰皇朝王皙注皙以古本校正闕誤又爲之

注仁廟時天下久承平人不習兵元昊旣叛邊將
數敗朝廷頗訪知兵者士大夫人人言兵矣故本
朝注解孫武書者大抵皆其時人也

何氏注孫子三卷

鼂氏曰未詳其名近代人也

吳子三卷

鼂氏曰魏吳起撰言兵家機權法制之說唐陸希
聲類次爲之說料敵治兵論將變化勵士凡六篇
高氏子略曰讀吳子其說蓋與孫武截然其不相
侔也起之書幾乎正武之書一乎奇吳之書尚禮

義明教訓或有得於司馬法者武則一切戰國馳
騁戰爭奪謀逞詐之術耳武侯浮西河下中流喟
然嘆曰美哉山河之固魏之寶也起言之曰在德
不在險德之不修舟中之人盡敵國也斯言之善
質於經求之古奚慚焉反覆此編則所教在禮所
貴在禮夫以湯武仁義律之起誠有間求之齊魯
晉衛秦楚之論兵者起庶幾乎

黃石公三略三卷

鼂氏曰題曰黃石公上中下三略其書論用兵機
權之妙嚴明之決明妙審決軍可以死易生可以

存易亡經籍志云下邳神人撰世傳此卽圯上老人以一編書授張良者

陳氏曰其書傳會依託也

西山真氏序曰三略先秦書雖非鷹揚翁自作要必其遺法予嘗深味之其言治國養民法度與儒者指意不悖而斂藏退守不爲物先之意則黃老遺言也子房號稱善用兵然最所得者不過與物推移變化無方因敵轉化動而輒隨數語耳以此推之則今傳於世者子房所受書也

尉繚子五卷

鼂氏曰未詳何人書論兵主刑法按漢藝文志有二十九篇今逸五篇首篇稱梁惠王問意其魏人歟

陳氏曰六國時人按漢志雜家有二十九篇兵形勢家又有三十一篇今書二十三篇未知果當時本書否

周氏涉筆曰尉繚子言兵理法兼盡然於諸令督責部伍刻矣所以爲善者能分本末別賓主所謂高之以廊廟之論重之以受命之論銳之以踰垠之論廊廟本也受命所以授也凡諸令所云將事

也踰垠之論爾視孫子專篇論火攻吳起武侯繼
碎講切蓋從容有餘矣人主崇儉務本均田節斂
明法稽驗爲之主本無蔓獄無留刑故曰兵凶器
爭逆德事必有本以武爲植以文爲種武爲表文
爲裏文視利害辨安危武犯強敵力攻守不攻無
過之城不殺無罪之人夫殺人之父兄利人之財
貨臣妾人之子女此皆盜也其說雖未純王政亦
可謂窺本統矣古者什伍爲兵有戰無敗有死無
逃自春秋戰國來長募旣行動輒驅數十萬人以
赴一決然後有逃亡不可禁故尉繚子兵令於誅

逃尤詳世傳張魏公建壇拜曲端爲大將端首問
魏公見兵幾何魏公曰八十萬人端曰須是斬了
四十萬人方得四十萬人用端所言果如是固覆
軍失地殺身之道也夫分數豈專在殺哉此念熏
烝決不能興起輯睦吸引安祥而尉繚子亦云善
用兵者能殺卒之半其次殺其十三其下殺其十
一能殺其半者威加海內殺十三者力加諸侯殺
十一者令行士卒筆之於書以殺垂教孫吳却未
有是論也

張橫渠注尉繚子一卷

鼂氏曰皇朝張載撰其辭甚簡蚤年喜談兵後謁范文正文正愛其才勸其學儒載感悟始改業此殆少作也

武侯十六策一卷

鼂氏曰蜀諸葛亮孔明撰序稱謹進便宜十六事一治國二君臣三視聽四納言五察疑六治民七舉措八考黜九治軍十賞罰十一喜怒十二治亂十三教令十四斬斷十五思慮十六陰察陳壽錄孔明書不載此策疑依託者

庾袞保聚圖一卷

鼂氏曰晉庾袞撰晉書孝友傳載袞字叔褒齊王冏之倡義也張泓等掠陽翟袞率衆保禹山泓不能犯此書序云大駕遷長安時元康三年己酉撰保聚壘議二十篇按冏之起兵惠帝永寧元年也帝遷長安永興元年也皆在元康後且三年歲次實癸丑今云己酉皆誤

李衛公問對三卷

鼂氏曰唐李靖對太宗問兵事史臣謂李靖兵法世無完書略見於通典今對問出於阮逸家或云逸因杜氏附益之

陳氏曰亦假託也文辭淺鄙尤甚今武舉以七書
試士謂之武經其間孫吳司馬法或是古書三略
尉繚子亦有可疑六韜問對僞妄明白而立之學
官置師弟子伏而讀之未有言其非者何也何遠
春渚紀聞言其父去非爲武學博士受詔校七書
以六韜問對爲疑白司業朱服服言此書行之已
久未易遽廢遂止後爲徐州教授與陳師道爲代
師道言聞之東坡世所傳王通元經關子明易傳
及李靖問對皆阮逸僞撰逸嘗以草示奉常公云
奉常公者老蘇也

按四朝國史兵志神宗熙寧間詔樞密院曰唐李
靖兵法世無全書雜見通典離析譌舛又官號物
名與今稱謂不同武人將佐多不能通其意令樞
密院檢詳官與王震曾攸王白郭逢原等校正分
類解釋令今可行豈卽此問答三卷邪或別有其
書也然鼂陳二家以爲阮逸取通典所載附益之
則似卽此書然神宗詔王震等校正之說旣明見
於國史則非逸之假託也

郭元振安邊策三卷

鼂氏曰唐郭元振撰以總兵進攻聚衆退守不可

無權謀乃著此書故舊題曰定遠安邊策

李臨淮武記

鼂氏曰唐李光弼撰其書凡一百二章末云呂望志廓而遠孫武思幽而密黃石寬而重斷吳起嚴而貴勇墨翟守而無攻老聃勝而不美今擇其精要雜以愚識爲一家書一本題曰統軍靈轄寶祕策或云光弼從事張參所纂

闕外春秋十卷

陳氏曰唐少室山布衣李筌撰起周武王勝殷止唐太宗擒竇建德明君良將戰爭攻取之事天寶

二年上之

風后握奇經一卷

陳氏曰永嘉薛士龍季宣校定自晉馬隆三百八十四字續圖三百十五字合標題七百字又有馬隆讚述多所發明并寫陳圖於後馬隆本奇作機高氏子略曰風后握奇經三百八十四字其妙本乎奇正相生變化不測蓋潛乎伏羲氏之畫所謂天地風雲龍鳥蛇虎則其爲八卦之象明矣蓋注奇讀如奇耦之奇則尤可與易準諸儒多稱諸葛武侯八陣唐李衛公六花皆在乎此唐裴緒之論

又以為六十四卦之變其出也無窮若此則所謂
八陣者八卦之統爾焦氏易學卦變至於四千九
十有六奇正相錯變化無窮是可以名數該之乎
然觀太公武韜且言牧野之師有天陣有地陣此
固出於握奇而又有入陣焉此又出於天地之外
者非八陣六花所能盡也獨孤及作風后八陣圖
記有曰黃帝順煞氣以作兵法文昌以命將風后
握機制勝作為陣圖故八其陣所以定位衡抗於
外軸布於內風雲負其四維所以備物也虎張翼
以進蛇向敵而蟠飛龍翔鳥上下其勢所以致用

也至若疑兵以固其餘地遊軍以按其後列門具
將發然後合戰弛張則二廣迭舉犄角則四奇皆
出圖成罇俎帝用經略北逐獯鬻南平蚩尤遺風
冥冥神機未昧項籍得之霸西楚黥布得之奄九
江孝武得之攘匈奴唐天寶中客有得其遺制於
黃帝書之外篇裂素而圖之按魚復之圖全本於
握機蹟其妙窮其神者武侯而已獨孤乃以為項
黥武帝得之未之思歟

人事軍律三卷

鼂氏曰皇朝符彥卿撰其序言兵者多雜言陰陽

殊不知往亡宋捷甲子胡興鶯入梟集翻成吉兆
故此但述人事云或以爲唐燕僧利正撰
神武祕略十卷

鼂氏曰皇朝仁宗御撰纂古今兵書戰策及舊史
成敗之迹類權謀形勢陰陽技巧凡四門三十篇
三朝武經聖略十卷

鼂氏曰皇朝曾公亮丁度撰寶元中西邊用兵朝
廷講武備是時洙奉詔編祖宗任將用兵邊防事
迹分二十門

陳氏曰凡十七門後五卷爲奏議中興書目云十

卷李淑書目十五卷今本與邯鄲卷數同
武經總要四十卷

鼂氏曰皇朝曾公亮丁度撰康定中朝廷恐羣帥
昧古今之學命公亮等采古兵法及本朝計謀方
略凡五年奏御制度十五卷邊防五卷故事十五
卷占候五卷御爲製序

巽岩李氏曰昔杜君卿取前世用兵故事分一百
三十餘門編入通典國朝修經武要略亦承用之
但微有附益耳

百將傳十卷

乾隆十二年校刊

經籍四十八

七

鼂氏曰皇朝張預公立撰預觀歷代將兵者所以成敗莫不與孫武書相符契因擇良將得百人集其傳成一書而以武之兵法題其後上之

陳氏曰每傳必以孫武兵法斷之

兵要望江南一卷

鼂氏曰題云黃石公以授張良者按其書雜占行軍吉凶寓聲於望江南詞取其易記憶總目云武安軍左押衙易靜撰蓋唐人也

倚馬立成法二卷

鼂氏曰唐李淳風撰兵行占候之書也淳風太宗

時人而此書起九宮法至貞元六年庚午假託以行其書耳非淳風真本也

三略素書解一卷

陳氏曰呂惠卿吉甫撰

熙寧收復熙河陣法三卷

陳氏曰觀文殿學士九江王韶子純撰

武經龜鑑二十卷

陳氏曰保平軍節度使王彥撰隆興御製序其書以孫子十三篇爲主而用歷代事證之

渭南祕訣一卷

陳氏曰昭武謝淵得之於瀘州蓋武侯八陣圖法也爲之注釋而傳於世

補漢兵制一卷

陳氏曰錢文子撰

西漢兵制一卷

陳氏曰建安王玲噐之撰

制勝方略三十卷

陳氏曰修武郎楊肅德欽撰自左氏傳而下迄於陳隋用兵事迹慶元丁巳序

漢兵論一卷

辨疑一卷

陳氏曰姑蘇潘夢旂天錫撰

修城法式條約二卷

陳氏曰判軍器監沈括知監丞呂和卿等所修敵樓馬面團敵式樣并申明條約熙寧八年上

文獻通考卷第二百二十一

鄴陽馬端臨貴與著

文獻通考卷第二百二十一
經籍考四十九

子醫家

漢藝文志醫經者原人血脉經絡骨髓陰陽表裏以起百病之本死生之分而用度鍼石湯火所施師古曰鍼所以刺病也石謂砭石即石鍼也古者攻病則有砭今其術絕矣調百藥齊和之所宜至齊之得齊音劑猶磁石取鐵以物相使拙者失理以瘡為劇以生為死

漢藝文志經方者本草石之寒溫量疾病之淺深假

藥味之滋因氣感之宜辯五苦六辛致水火之齊以
通閉解結反之於手及失其宜者以熱益熱以寒增
寒精氣內傷不見於外是所獨失也故諺曰有病不
治常得中醫

漢志醫經七家二百一十六卷

漢志經方十一家二百七十四卷

隋志醫方二百五十六部四千五百一十三卷

唐志明堂經脉類一十六家三十五部二百三十一卷

失姓名十六家甄權以下不著錄二家十卷

唐志醫術六十四家一百二十部四千四十六卷

失姓名三

十八家王方慶以下不著錄五十五家四百八卷

宋三朝志經脉四十六部一百四十卷醫術一百九十一部二千九十九卷

宋兩朝志經脉二十九部四十五卷醫術八十四部二百二十六卷

宋四朝志三十六部二百九卷

宋中興志一百七十九家二百九部一千二百五十九卷

黃帝素問二十四卷

鼂氏曰昔人謂素問者以素書黃帝之問猶言素

書也唐王冰注砭謂漢藝文志有黃帝內經十八卷素問卽其經之九卷兼靈樞九卷迺其數焉先是第七亡逸砭時始獲乃詮次注釋凡八十一篇分二十四卷今又亡刺法本論二篇砭自號啟元子醫經之傳於世者多矣原百病之起瘡者本乎黃帝辯百藥之味性者本乎神農湯液則稱伊尹三人皆古聖人也憫世疾苦親著書以垂後而世之君子不察乃以爲賤技恥習之由此故今稱醫者多庸人治之失理以生爲死者甚衆激者至云有病不治常得中醫豈其然乎故予錄醫頗詳隋

志以此書爲首今從之

陳氏曰黃帝與岐伯問答三墳之書無傳尙矣此固出於後世依託要是醫書之祖也唐太僕令王冰注自號啟元子按漢書但有黃帝內外經至隋志乃有素問之名又有全元起素問注八卷嘉祐中光祿卿林億國子博士高保衡承詔校定補注亦頗采元起之說附見其中其爲篇八十有一王冰者寶應中人也

靈樞經九卷

鼂氏曰王冰謂此書卽漢志黃帝內經十八卷之

九也或謂好事者於皇甫謐所集內經倉公論中抄出之名爲古書也未知孰是

呂楊注八十一難經五卷

鼂氏曰秦越人撰吳呂廣注唐楊元操演越人渤海人家於盧授桑君秘術明洞醫道世以其與黃帝時扁鵲相類乃號之爲扁鵲采黃帝內經精要之說凡八十一章以其爲趣深遠未易了故名難經元操編次爲十三類

陳氏曰漢志亦但有扁鵲內外經而已隋志始有難經唐志遂屬之越人皆不可考難當作去聲讀

丁德用注難經五卷

鼂氏曰德用以楊元操所演甚失大義因改正之經文隱奧者繪爲圖德用濟陽人嘉祐末其書始成

陳氏曰序言太醫令呂廣重編此經而楊元操復爲之註覽者難明故爲補之且間爲之圖首篇爲診候最詳凡二十四難蓋脉學自扁鵲始也

虞庶注難經五卷

鼂氏曰皇朝虞庶注庶仁壽人寓居漢嘉少爲儒已而棄其業習醫爲此書以補呂楊所未盡黎泰

辰治平間爲之序

金匱玉函經八卷

鼂氏曰漢張仲景撰晉王叔和集設答問雜病形證脈理參以療治之方仁宗朝王洙得於館中用之甚効合二百六十二方

陳氏曰林億等校正此書王洙於館閣蠹簡中得之曰金匱玉函要畧方上卷論傷寒中論雜病下載其方并療婦人乃錄而傳之今書以逐方次於證候之下以便檢用其所論傷寒文多節畧故但取雜病以下止服食禁忌二十五篇二百六十二

方而仍其舊名

仲景傷寒論十卷

鼂氏曰漢張仲景述晉王叔和撰次按名醫錄云仲景南陽人名機仲景其字也舉孝廉官至長沙太守以宗族二百餘口建安紀年以來未及十稔死者三之二而傷寒居其七乃著論二十二篇證外合三百九十七法一百一十二方善醫者或云仲景著傷寒論誠不刊之典然有大人之病而無嬰孺之患有北方之藥而無南方之治此其所闕者蓋陳蔡以南不可用柴胡白虎一湯治傷寒其

言極有理

陳氏曰其文辭簡古奧雅又名傷寒卒病論凡一百一十二方古今治傷寒者未有能出其外者也
脉經三卷

鼂氏曰題云黃帝撰論診脉之要凡二十一篇
王叔和脉經十卷

鼂氏曰晉王叔和撰按唐甘伯宗名醫傳曰叔和西晉高平人性度沉靖博通經方精意診處尤好著述其書纂岐伯華佗等論脉要訣所成叙陰陽表裏辯二部九候分人迎氣口神門條十二經二

十四氣奇經八脉五臟六腑三焦四時之疴纖悉備具咸可按用凡九十七篇皇朝林億等校正
脉訣一卷

鼂氏曰題曰王叔和皆歌訣鄙淺之言後人依託者然最行於世

脉訣機要三卷 脉要新括一卷

陳氏曰通真子撰不著名氏熙寧以後人也以叔和脉訣有艱脆鄙俗處疑非叔和作以其不類故也乃作歌百篇按經爲注又自言常爲傷寒括要六十篇其書未之見

巢氏病源候論五卷

鼂氏曰隋巢元方等撰元方大業中被命與諸醫共論衆病所起之源皇朝舊制監局用此書課試醫生昭陵時詔校本刻牘頒行宋綬爲序

陳氏曰元方隋太醫博士其書惟論病證不載方藥今按千金方諸論多本此書業醫者可以參考
雷公炮炙三卷

鼂氏曰宋雷斅撰胡洽重定述百藥性味炮炙灸之方其論多本之於乾寧晏先生斅稱內究守國安正公當是官名未詳

天元玉策三十卷

鼂氏曰啟元子撰卽唐王珣也書推五運六氣之變唐人物志云珣仕至太僕令年八十餘以壽終
金寶鑑三卷

鼂氏曰衛嵩撰嵩仕至翰林博士崇文總目云不詳何代人述脉候徵驗要妙之理

寶臟暢微論三卷

鼂氏曰五代軒轅述撰青霞君作寶臟論三篇著變煉金石之訣旣詳其未善因刊其謬誤增其闕漏以成是書故曰暢微時年九十實乾亨二年也

聖濟經十卷

鼂氏曰徽宗皇帝御製因黃帝內經採天人之蹟
原性命之理明營衛之清濁究七八之盛衰辯逆
順之盈虛爲書十篇凡四十二章

陳氏曰辟廡學生昭武吳昶注

通真子傷寒訣一卷

鼂氏曰題曰通真子而不著名氏用張長沙傷寒
論爲歌詩以便覽者脉訣之類也

醫門玉髓一卷

陳氏曰不知作者皆爲歌訣論五臟六腑相傳之

理

傷寒百問三卷

鼂氏曰題曰無求子大觀初所著書

醫經正本書一卷

陳氏曰知進賢縣沙隨程迥可久撰專論傷寒無
傳染以救薄俗骨肉相棄絕之敝

運氣論奧三卷

鼂氏曰宋朝劉温舒撰温舒以素問氣運最爲治
病之要而答問紛揉文辭古奧讀者難知因爲三
十論二十七圖上於朝

五運指掌賦圖一卷

陳氏曰葉玠撰

脉粹一卷

鼂氏曰宋朝蕭世基撰世基常閱素問及歷代醫經患其難知因綴緝成一編治平中姚誼序之

南陽活人書二十卷

鼂氏曰宋朝朱肱撰序謂張長沙傷寒論其言雅奧非精於經絡者不能曉會項因投閑設其對問補苴綴緝僅成卷軸作於己巳成於戊子計九萬一千三百六十八字

陳氏曰肱以仲景傷寒方論多以類聚爲之問答本號無求子傷寒百問方有武夷張藏作序易此名仲景南陽人而活人者本華陀語肱吳興人祕丞臨之子中書舍人服之弟登第仕至朝奉郎直祕閣

傷寒微指論二卷

陳氏曰不著作者序言元祐丙寅必當時名醫也其書頗有發明

傷寒證治三卷

鼂氏曰宋朝王實編實謂百病之急無踰傷寒故

畧舉病名法及世名醫之言爲十三篇總方百四十六首或云潁州人官至外郎龐安常之高弟也傷寒抹俗方一卷

陳氏曰寧海羅適正之尉桐城民俗惑巫不信藥因以藥施人多愈遂以方書召醫參校刻石以抹迷信俗紹興中有王世臣彥輔者序之以傳

補注神農本草二十卷

鼂氏曰宋朝掌禹錫等補注舊說本草經神農所作而藝文志所不載平帝紀詔天下舉知方術本草者本草之名蓋起於此梁之錄載神農本草三

卷書中有後漢郡縣名蓋上世未著文字師學相傳至張機華佗始爲編述嘉祐初詔禹錫與林億蘇頌張洞等爲之補注以開寶本草及諸家參校采拾遺逸刊定新舊藥各一千八十二種總二十卷

大觀本草三十一卷

陳氏曰唐慎微撰不知何人仁和縣尉艾晟作序名曰經史證類本草按本草之名始見漢書平帝紀樓護傳舊經止一卷藥三百六十五種陶隱居增名醫別錄亦三百六十五種因注釋爲七卷唐

顯慶又增一百十四種廣爲二十卷謂之唐本草
開寶中又益一百三十三種蜀孟和又嘗增益謂
之蜀本草及嘉祐中掌禹錫林億等重加校正更
爲補注以朱墨書爲之別凡新舊藥一千八十二
種蓋亦備矣今慎微頗復有所增益而以墨蓋其
名物之上然亦殊不多也

石林葉氏曰神農本草初但三卷所載甚畧議者
考其記出產郡名以爲東漢人所作梁陶隱居始
增修爲七卷然陶氏不至東北其論證多謬語唐
顯慶中蘇恭請重修於是命長孫無忌等廣定遂

爲二十卷亦未盡也自是僞蜀韓保昇與術家各
自補緝辯證者不一開寶中別加詳定嘉祐初復
詔掌祕監禹錫蘇魏公諸人再論次遂大備蓋神
農本草外雜取他書凡十六家云

圖經本草二十卷 目錄一卷

鼂氏曰宋朝蘇頌等撰先是詔掌禹錫林億等六
人重校神農本草累年成書奏御又詔郡縣圖上
所產藥本用永徽故事重命編述於是頌再與禹
錫等哀集衆說類聚銓次各有條目云嘉祐六年
上

證類本草三十二卷

鼂氏曰皇朝唐慎微纂合兩本草爲一書且集書傳所記單方附之於本條之下殊爲詳博

本草廣義二十卷

鼂氏曰皇朝寇宗奭編以本草二部著撰之人或執用已私失於商確併考諸家之說參之事實覈其情理證其脫誤以成此書

陳氏曰其書引援辯證頗可觀采

紹興校定本草二十二卷

陳氏曰醫官王繼先等奉詔撰紹興二十九年上

之刻板修內司每藥爲數語辯說淺俚無高論
子午經一卷

鼂氏曰題云扁鵲撰論鍼砭之要成歌詠蓋後人依託者

銅人鍼灸圖三卷

鼂氏曰皇朝王惟德撰仁宗嘗詔惟德考次鍼灸之法鑄銅人爲式分腑臟十二經旁注俞冗所會刻題其名并爲圖法并主療之術刻板傳於世夏竦爲序明堂者謂雷公問道黃帝授之故名云

明堂鍼灸圖三卷

龔氏曰題曰黃帝論人身俞穴及灼灸禁忌
存真圖一卷

龔氏曰皇朝楊介編崇寧間泗州刑賊於市郡守
李夷行遣醫併畫工往親決膜摘膏肓曲折圖之
盡得纖悉介校以古書無少異者比歐希範五臟
圖過之遠矣實有益醫家也王莽時捕得翟義黨
王孫慶使太醫尙方與巧屠共剝剝之量度五臟
以竹筵導其脉知所始終云可以治病亦是此意
膏肓灸法二卷

陳氏曰清源莊綽季裕集

點烙三十六黃經一卷

龔氏曰不著撰人唐世書也國史補云自茗飲行
於世世人不復病黃痺

肘後百一方三卷

陳氏曰晉葛洪撰梁陶隱居增補本名肘後救卒
方率多易得之藥凡八十六首陶併七首加二十
二首共爲一百一首取佛書人有四大一大輒有
一病之義名之

千金方三十卷

龔氏曰唐孫思邈撰思邈博通經傳洞明醫術著

用藥之方診脉之訣鍼灸之穴禁架之法以至導引養生之要無不周悉後世或能窺其一二未有不爲名醫者然議者頗恨其獨不知傷寒之數云陳氏曰自爲之序名曰千金備急要方以爲人命至重有貴千金一方濟之德踰於此其前類例數十條林億等新纂

千金翼方三十卷

晁氏曰思邈著千金方復掇集遺軼以羽翼其書成一家之言林億等謂首之以藥錄次之以婦人傷寒小兒養性辟穀退居補益雜病瘡癰色脉鍼

灸而禁經終焉者皆有指意云

陳氏曰其末兼及禁術用之多驗

外臺祕要方四十卷

晁氏曰唐王燾撰燾在臺閣二十年久知洪文館得古方書數千百卷因述諸病證候附以方藥符禁灼灸之法凡一千一百四門天寶中出守房陵及太寧郡故以外臺名其書孫兆以燾謂鍼能殺生人不能起死人取灸而不取鍼譏其爲醫之蔽予獨以其言爲然

陳氏曰自爲序天寶十一載也其書博采諸家方

論如肘後千金世尚多有之至小品深師崔氏許
仁則張文仲之類今無傳者猶間見於此書云凡
醫書之行於世皆仁廟朝所校定也按會要嘉祐
二年置校正醫書局於編脩院以直集賢院掌禹
錫林億校理張洞校勘蘇頌等並爲校正後又命
孫奇高保衡孫兆同校正每一書畢卽奏上億等
皆爲序下國子監板行并補注本草脩圖經千金
方翼金匱要略傷寒悉從摹印天下皆知學古方
書矣

產寶二卷

鼂氏曰唐咎殷撰殷蜀人大中初白敏中守成都
其家有因免乳死者訪問名醫或以殷對敏中迎
之殷集備驗方藥二百七十八首以獻其後周頌
又作三論附於前

龍樹眼論三卷

鼂氏曰佛經龍樹大士者能治眼疾假其說集治
七十二種目病之方

文獻通考卷第二百二十一

文獻通考卷第二百二十三

鄱陽馬端臨貴與著

經籍考五十

子醫家

太平聖惠方一百卷

鼂氏曰太宗皇帝在潛邸日多蓄名方異術太平
興國中內出親驗者千餘首乃詔醫局各上家傳
方書命王懷隱王祐鄭彥陳昭遇校正編類各篇
首著其疾證淳化初書成御製序引

慶歷善救方一卷

乾隆十二年校刊

文獻通考卷第二百二十三 經籍五十

兩朝藝文志詔以福州奏獄醫林士元藥下蠱毒人以獲全錄其方令國醫類集附益八年頒行
皇祐簡要濟衆方五卷

兩朝藝文志皇祐中仁宗謂輔臣曰外無善醫民有疾疫或不能救療其令太醫簡聖惠方之要者頒下諸道仍勅長史按方劑以時拯濟令醫官使周應編以爲此方三年頒行

太醫局方十卷

鼂氏曰元豐中詔天下高手醫各以得效祕方進下太醫局驗試依方製藥醫之仍模本傳於世

和劑局方十卷

鼂氏曰大觀中詔通醫刊正藥局方書閱歲書成校正七百八字增損七十餘方

陳氏曰庫部郎中陳師文等校正凡二十一門二百九十七方其後時有增補

王氏博濟方五卷

鼂氏曰皇朝太原王袞撰慶歷間因官滑臺暇日出家藏七十餘方擇其善者爲此書名醫云其方用之無不效如草還丹治大風太乙丹治鬼胎尤奇驗

藥準一卷

陳氏曰潞公文彥博寬夫撰所集方才四十首以爲依本草而用藥則有準故以此四十方爲處方用藥之準也

沈存中良方十卷

鼂氏曰皇朝沈括存中撰存中博學通醫術類其經驗方成此書用者多驗或以蘇子瞻論醫藥雜說附之

陳氏曰不知何人所錄其間辯雞舌香一段言靈苑所辯猶有未盡者館閣書目別有沈氏良方十

卷蘇沈良方十五卷而無靈苑方

靈苑二十卷

鼂氏曰亦存中編本朝士夫如高若訥林億孫奇龐安常皆以善醫名世而存中尤善方書此書所載多可用

孫氏傳家祕寶方三卷

陳氏曰尚藥奉御太醫令孫用和集其子殿中丞兆父子皆以醫名自昭陵時迄於熙豐無能出其右者元豐八年兆弟宰爲河東漕屬呂惠卿帥并從宰得其書序而刻之自言爲思邈之後鼂氏讀

書志作孫尚祕寶方凡十卷

養生必用方十六卷

鼂氏曰皇朝初虞世撰序謂古人醫經行於世者多矣所以別著者古方分劑與今銖兩不侔用者頗難此方其證易詳其法易用苟尋文爲治雖不習之人亦可無求於醫也虞世本朝士一旦削髮爲僧在襄陽與十父遊從甚密

尊生要訣二卷

陳氏曰卽初虞世四時常用要方有廬山陳淮者復附益焉

楊子護命方五卷 通神論十四卷

鼂氏曰皇朝楊退修撰以岐伯論五運六氣以治百病後世通之者惟王砮一人而已然猶於遷變行度莫知其始終次序故著此方論云

龐氏家藏祕寶方五卷

陳氏曰蘄水龐安時安常撰安時以醫名世所著書傳於世者惟傷寒而已此書南城吳炎晦父錄以見遺

山谷黃氏龐安常傷寒論後序安常自少時善醫方爲人治病處其生死多驗名傾江淮諸醫然爲

氣任俠鬪雞走狗蹴鞠擊毬少年豪縱事無所不
爲博奕音技一工所難而兼能之家富多後房不
出戶而所欲得人之以醫聘之也皆多陳其所好
以順適其意其來也病家如市其疾已也君脫然
不受謝而去之中年乃屏絕戲弄閉門讀書自神
農黃帝經方扁鵲八十一難經靈樞甲乙葛洪所
綜緝百家之言無不貫穿其簡策紛錯黃素朽蠹
先師或失其讀學術淺陋私智穿鑿曲士或竄其
文安常悉能辯論發揮每用以視病如是而生如
是而不治幾乎十全矣然人以病造之不擇貴賤

貧富便齋曲房調護以寒暑之宜珍膳羹饌時節
其饑飽之度愛其老而慈其幼如痛在己也未嘗
輕用人之疾常試其所不知之方蓋其輕財如糞
土而樂義耐事如慈母而有常似秦漢間游俠而
不害人似戰國四公子而不爭利所以能動而得
意起人之疾不可縷數他日過之未嘗有德色其
所論著傷寒論多得古人不言之意其所師用而
得意於病家之陰陽虛實今世所謂良醫十不得
其五也余始欲掇其大要論其精微使士大夫稍
知之適有心腹之疾未能卒業然未嘗游其庭者

雖得吾言而不解若有意於斯者讀其書自足攬其精微故特著其行事以爲後序云其前序海上道人諾爲之故虛右以待

宛邱張氏跋傷寒論曰張仲景傷寒論論病處方纖悉必具又爲之增損進退之法以預告人嗟夫仁人之用心哉且非通神造妙不能爲也安常又竊憂其有病證而無方者續著爲論數卷用心爲術追儷古人淮南謂安常能與傷寒說話豈不信哉

錢氏小兒方八卷

龜氏曰皇朝錢乙仲陽撰神宗時擢太醫丞於書無所不窺他人勤勤守古獨度越縱舍卒與法合尤邃本草多識物理辯正闕誤最工療嬰孺病年八十二而終閻季忠方附其後

錢氏小兒藥證真訣三卷

陳氏曰錢仲陽撰閻季忠集上卷言證中卷敘嘗所治病下卷爲方季忠亦頗附以已說且以劉斯立所作仲陽傳附於末宣和元年也

嬰童寶鏡十卷

龜氏曰題曰栖真子不著姓名錄世行應驗方成

此書

小兒靈祕方十三卷

鼂氏曰不題撰人辯小兒疾證及治療之方多爲歌訣

小兒玉訣一卷

鼂氏曰未詳撰人名氏爲韻語以記小兒疾證治法二十三

醫說十卷

陳氏曰新安張景季明撰

食治通說一卷

陳氏曰東虢婁居中撰臨安藥肆金藥曰者有子登第以恩得初品官趙忠定丞相跋其後書凡十六篇大要以食治則身治此上工醫未病之一術也

趙丞相序畧曰君自幼業醫至是歷八十一寒暑矣錢唐行都多貴人君未嘗出謁卿相王侯之家屢迎之不可致每日旦肩輿至藥肆羣兒已四集悲啼叫號囂然滿室君皆調護委曲坐良久徐起枚視之一以至之先後爲序輒爲言兒本無疾愛之者害之也如言兒下利時此爲脾虛乳食過傷所

致惟苦節其乳食微以參朮藥溫其胃卽愈矣而
愛之者曰兒數利氣且乏非強食莫補其所喪於
是胃虛不能攝化其氣重傷參朮弗効增以薑附
薑附不已重以金石而兒殆矣胡不以身喻之方
吾曹盛壯時日食二升米飯幾不滿欲一日意中
微不佳則粒米不堪向口何況兒乎予每視君持
藥欲授時必諄諄爲人開說口幾欲破又爲紙囊
貯藥各著其說於上使歸而勿忘焉

治病須知一卷

陳氏曰不知名氏專論外證以用藥之次第爲不

能脉者設也

正俗方一卷

陳氏曰知虔州長樂劉彝執中撰以虔俗信巫無
醫藥集此方以教人

奉親養老書一卷

陳氏曰泰州興化令陳真撰元豐中人

小兒斑疹論一卷

陳氏曰東平董汲及之撰錢乙元祐癸酉題其末
脚氣治法一卷

陳氏曰董汲撰

指迷方三卷

陳氏曰考城子王貺子亨撰吳丞相敏爲之序貺爲南京名醫宋毅叔之壻宣和中以醫得幸至朝請大夫

九籥衛生方三卷

陳氏曰宣和宗室忠州防禦使士紆撰

治風一卷

陳氏曰張耒文潛所傳凡三十二方

小兒醫方妙選三卷

陳氏曰成安大夫惠州團練使張渙撰凡四百二

十方渙五世爲小兒醫未嘗改科靖康元年自爲之序

鷄峯備急方一卷

陳氏曰太醫教授張銳撰紹興三年爲序大抵皆單方也

產育保慶集一卷

陳氏曰濮陽李師聖得產論二十一篇有其說而無其書醫學教授郭稽中以方附諸論之末遂爲全書近時括蒼陳言嘗評其得失於三因方婺醫杜菽者又附益之頗爲詳備

本事方十卷

陳氏曰維揚許叔微知可撰紹興三年進士第六人以藥餌陰功見於夢寐事載夷堅志晚歲取平生已試驗之方併記其事實以爲此書取本事詩詞之例以名之

傷寒歌三卷

陳氏曰許叔微撰凡百篇皆本仲景法又有治法八十一篇及仲景脉法三十六圖翼傷寒論二卷辯類五卷皆未見

指南方二卷

陳氏曰蜀人史堪載之撰凡三十一門各有論
楊氏方二十卷

陳氏曰樞密楊俛子靖以家藏方一千一百十有一首刻之當塗世多用之

本草單方三十五卷

陳氏曰工部侍郎宛邱王俛碩父撰取本草諸藥條下所載單方以門類編之凡四千二百有六方

何氏方六卷

陳氏曰太常博士括蒼何偁德揚撰

洪氏方一卷

乾隆十二年校刊

經籍五十

陳氏曰鄱陽洪氏

莫氏方一卷

陳氏曰刑部郎中吳興莫伯虛致道刻博濟方於永嘉而以其家藏經驗方附於後

備急總效方四十卷

陳氏曰知平江府溧陽李朝正撰大抵皆單方也是齋百一選方三十卷

陳氏曰山陰王璆孟玉撰百一言其選之精也

三因極一方六卷

陳氏曰括蒼陳言無擇撰三因者內因外因不內

外因其說出金匱要畧其所述方論往往皆古書也

小兒保生方三卷

陳氏曰左司郎姑孰李櫟與幾撰

傷寒要旨二卷

陳氏曰李櫟撰列方於前而類證於後皆不外仲景

漢東王氏小兒方二卷

陳氏曰不著名

幼幼新書五十卷

陳氏曰直龍圖閣知潭州劉昉方明撰集刊未畢
而死徐壽壽卿以漕攝郡趣成之

大衍方十二卷

陳氏曰朝散大夫孫紹遠稽仲撰凡藥當預備者
四十九種故名大衍所在易得者不與焉諸方附
於後

海上方一卷

陳氏曰不著姓名括蒼刻本館閣書目有此方云
乾道中知處州錢竽編

集效方一卷

胎產經驗方一卷

陳氏曰南康守李觀民集

陳氏曰陸子正撰集

葉氏方三卷

陳氏曰太社令延平葉大廉撰

胡氏方一卷

陳氏曰不著名

傳道適用方二卷

陳氏曰稱拙菴吳彥夔淳熙庚子

陳氏手集方一卷

陳氏曰建安陳抃

選奇方十卷 後集十卷

陳氏曰青田余綱堯舉撰

傷寒瀉痢要方一卷

陳氏曰直龍圖閣長樂陳孔碩膚仲撰

湯氏嬰孩妙訣二卷

陳氏曰東陽湯衡撰衡之祖民望精小兒醫有子
曰麟登科衡麟之子尤邃於祖業爲此書也十九

篇

諸家名方二卷

陳氏曰福建提舉司所刊市肆常貨而局方所未
收者

易簡方一卷

陳氏曰永嘉王碩德膚撰增損方三十首
嘔咀藥三十品市肆常貨圓子藥十種以爲倉卒應用之
備其書盛行於世

四時治要方一卷

陳氏曰永嘉屠鵬時舉撰專爲時疾瘧痢吐瀉傷
寒之類雜病不與焉

治奇疾方一卷

陳氏曰夏子益撰凡三十八道皆奇形怪證世間所未見者

傷寒證類要略二卷 玉鑑新書二卷

陳氏曰汴人平堯卿撰專爲傷寒而作皆仲景之舊也亦別未有發明

瘡疹證治一卷

陳氏曰金華謝天錫撰

產寶諸方一卷

陳氏曰不著名氏集諸家方而以十二月產圖冠之

纂要備急諸方一卷

陳氏曰不知何人集皆倉卒危急所須藥及雜術也

摘要方一卷

陳氏曰傷寒十勸及危證十病末載托裏十補散方

劉涓子神仙遺論十卷

陳氏曰東蜀刺史李頔錄按中興書目引崇文總目云宋龔慶宣撰劉涓子者晉末人於丹陽縣得鬼遺方一卷皆治癰疽之法慶宣得而次第之今

按唐志有慶宣劉涓子男方十卷未知卽此書否
卷或一板或止數行名爲十卷實不多也

衛濟寶書一卷

陳氏曰稱東軒居士不著名氏治癰疽方也

外科保安方三卷

陳氏曰知興化軍毫社張允蹈家藏方龔參政茂
良劉太史夙爲之序跋

五發方論一卷

陳氏曰不知名氏亦吳晦父所錄

李氏集驗背疽方一卷

陳氏曰泉江李迅嗣立撰凡五十一條其論議詳
盡曲當

皇帝醫相馬經三卷

晁氏曰唐穆螽集伯樂王良等六家書成此編皇
帝斥神農也

育駿方三卷

晁氏曰未詳撰人相馬術及醫治畜牧之方

相馬經一卷

晁氏曰未詳撰人相馬法式并著馬之疾狀及治
療之術李氏書目有之

文獻通考卷第二百二十三

文獻通考卷第二百二十四

鄱陽馬端臨貴與著

經籍考五十一

子房中神僊

漢藝文志房中者情性之極至道之際是以聖王制外樂以禁內情而為之節文傳曰先王之作樂所以節百事也樂而有節則和平壽考及迷者弗顧以生疾而隕性命

漢志房中八家百八十六卷

右房中

漢藝文志神僊者所以保性命之真而游泳於其外者也聊以盪意平心同死生之域而無怵惕於胷中然而或者專以爲務則誕欺怪迂之文彌以益多非聖王之所以教也孔子曰索隱行怪後世有述焉吾不爲之矣

漢志神僊家二百五卷

隋經籍志曰道經者云有元始天尊生於太元之先稟自然之氣冲虛凝遠莫知其極所說天地淪壞劫數終盡略與佛經同而以天尊之體常存不滅每至天地初開或在玉京之上或在窮桑之野授以祕道

謂之開劫度人然其開劫非一度矣故有延康赤明龍漢開皇是其年號其間相去經四十一億萬載所度皆諸天仙上品有太上老君太上丈人天真皇人五方天帝及諸仙官轉共承受世人莫之豫也所說之經亦稟元一之炁自然而有非所造爲亦與天尊常在不滅天地不壞則蘊而莫傳劫運常開其文自見凡八字盡道體之奧謂之天書字方一丈八角垂芒光輝照耀驚心眩目雖諸天仙不能省視天尊之開劫也乃命天真皇人改囀天音而辯析之自天真以下至於諸仙輾轉節級以次相授諸仙得之始授

世人然以年天尊經歷年載始一開劫受法之人得而寶祕亦有年限方始傳授上品則年久下品則年近故今受道者經四十九年始得授人推其大旨蓋亦歸於仁愛清淨積而修習漸致長生自然神化或白日登僊與道合體其受道之法初受五千文籙次受三洞籙次受洞元籙次上清籙籙皆素書紀諸天曹官屬佐吏之名有多少又有諸符錯在其間文章詭怪世所不識受者必先潔齋然後齎金環一并諸贄幣以見於師師受其贄以籙授之仍剖金環各持其半云以爲約弟子得籙緘而佩之其潔齋之法有

黃籙玉籙金籙塗炭等齋爲壇三成每成皆置絳蕪以爲限域傍各開門皆有法象齋者亦有人數之限以次入於絳蕪之中魚貫面縛陳說愆咎告白神祇晝夜不息或一二七日而止而齋數之外有人者並在絳蕪之外謂之齋客但拜謝而已不面縛焉而又

有消災度厄之法依陰陽五行數術推人年命書之如章表之儀并具贄幣燒香陳讀云奏上天曹請爲除厄謂之上章夜中於星辰之下陳設醮脯麩餌幣物歷祀天皇太一祀五星列宿爲書如上章之儀以奏之名之爲醮又以木爲印刻星辰日月於其上吸

文獻通考卷三百四
三
氣執之以印疾病多有愈者又能登刀入火而焚勅
之使刃不能害火不能熱而又有諸服餌辟穀金丹
玉漿雲英蠲除滓穢之法不可殫記云自上古皇帝
帝嚳夏禹之儔並遇神人咸受道籙年代既遠經史
無聞焉推詳事迹漢時諸子道書之流有三十七家
大旨皆去健美處冲虛而已無上天官符籙之事其
黃帝四篇老子二篇最得深旨故言陶弘景者隱於
句容好陰陽五行風角星算修辟穀導引之法受道
經符籙武帝素與之遊及禪代之際弘景取圖讖之
文合成景梁字以獻之由是恩遇甚厚又撰登真隱

訣以證古有神仙之事又言神丹可成服之則能長
生與天地永畢帝令弘景試合神丹竟不能就乃言
中原隔絕藥物不精故也帝以爲然敬之尤甚然武
帝弱年好事先受道法及卽位猶自上章朝士受道
者衆三吳及邊海之際信之踰甚陳武世居吳興故
亦奉焉後魏之世嵩山道士寇謙之自云嘗遇真人
成公興後遇太上老君授謙之爲天師而又賜之雲
中音誦科誡二十卷又使玉女授其服氣導引之法
遂得辟穀氣盛體輕顏色鮮麗弟子二十餘人皆得
其術其後又遇神人李譜云是老君元孫授其圖籙

真經劾召百神六十餘卷及銷鍊金丹雲英八石玉漿之法太武始光之初奉其書而獻之帝使謁者奉玉帛牲牢祀嵩嶽迎致其餘弟子於代都東南起壇宇給道士百二十人顯揚其法宣布天下太武親備法駕而受符籙焉自是道業大行每帝卽位必受符籙以爲故事刻天尊及諸仙之象而供養焉遷洛已後置道場於南郊之旁方二百步正月十月之十五日並有道士等人百六人拜而祠焉後齊武帝遷鄴遂罷之文襄之世更置館宇選其精志者使居焉後周承魏崇奉道法每帝受籙如魏之舊尋與佛法俱滅開皇初又興高宗雅信佛法於道士篋如也大業中道士以術進者甚衆其所講經由以老子爲本次講莊子及靈寶昇元之屬其餘衆經或言傳之神人篇卷非一自云天尊姓樂名靜信例皆淺俗故世甚疑之其術業優者行諸符禁徃徃神驗而金丹玉液長生之事歷代糜費不可勝紀竟無效焉今考其經目之數附之於此

隋志三百七十七部一千二百一十六卷

唐志三十五家五十部三百四十一卷

失姓名十三家自道藏音義以

下不著錄六十二家二百六十五卷

乾隆十二年校刊

經籍五十一

五

宋三朝國史志曰班志藝文道家之外復列神仙在方伎中東漢後道教始著而真仙經誥別出焉唐開元中列其書爲藏目曰三洞瓊綱總三千七百四十四卷厥後亂離或至亡缺宋朝再遣官校定事具道釋志嘗求其書得七千餘卷命徐鉉等讎校去其重複裁得三千七百三十七卷大中祥符中命王欽若等照舊目刊補凡四千三百五十九卷洞真部六百部一千一十三卷洞神部一百七十二卷太真部一千四百七卷太平部一百九十二卷太清部五百七十六卷正一部合爲新錄凡四千三百五十九又撰三百七十卷篇目上獻賜名曰寶文統錄隋志以道經目附四部

之末唐母照錄散在乙丙部中今取修鍊服餌步引黃治符籙章醮之說素藏館閣者悉錄於此

宋三朝志九十七部六百二十五卷

宋兩朝志四百一十三部

宋四朝志二十部

宋中興志三百九十六家四百四十七部一千三百二十一卷

度人經三卷

鼂氏曰元始天尊說唐志有其目古書也神仙之說其來尚矣劉歆七略道家之學與神仙各爲錄

其後學神仙者稍稍自附於黃老乃云有元始天尊者生於太元之先姓樂名靜信常存不滅每天地開闢則以祕道授諸仙謂之開劫度人延康赤明龍漢開皇卽其紀年也授其道者漸至長生或白日昇天其學有授籙之法名曰齋有拜章之儀名曰醮又有符祝以攝治鬼神服餌以蠲穢濁至於存想之方導引之訣烹鍊變化之術其類甚衆及葛洪寇謙陶弘景之徒相望而出其言益熾於世富貴者多惑焉然通人皆疑之宋朝修道藏共六部二百一十一帙而神仙之學如上所陳者居

多與道家絕不類今於其間取自昔書目所載者錄之又釐而爲二凡其說出於神仙者雖題曰老子黃帝亦皆附於此不以名亂實也若夫容成之術雖收於歆輩者以薦紳先生難言之特削去不錄

大洞真經一卷

鼂氏曰題云高上虛皇君等道書三十七章晉永和年中上清紫微元君降授於王夫人是上清高法道藏書六部一曰大洞真部二曰靈寶洞元部三曰太上洞神部四曰太真部五曰太清部六曰正

一部李氏道書志四類一曰經誥類二曰傳錄類
三曰丹藥類四曰符篆類皆以此書爲之首然唐
志不載故以次度人經云

黃庭內景經一卷

鼂氏曰題大帝內書藏暘谷陰三十六章皆七言
韻語梁邱子叙云扶桑大帝命暘谷神王傳魏夫
人一名東華玉篇黃者中央之色庭者四方之中
外指事卽天人地內指事卽肺心脾中故曰黃庭
內景

中黃經二卷

鼂氏曰題九仙君撰中黃真人注亦名胎臟論

黃庭外景經三卷

鼂氏曰叙謂老子所作與法帖所載晉王羲之所
書本正同而文句頗異其首有老子閒居作七言
解說身形及諸神兩句其末有吾言畢矣而妄陳
一句且改淵爲泉改治爲理疑唐人誕者附益之
崇文總目云記天皇氏至帝嚳受道得仙事此本則
無之

陳氏曰黃庭外景經一卷務成子注是南岳魏夫
人所受者魏舒之女也

無仙子刪正黃庭經

歐陽文忠公序之意必公所自爲而隱其名耳其序曰無仙子不知爲何人也無姓名無爵里世莫得而名之其自號爲無仙子者以警世人之學仙者也其爲言曰自古有道無仙而後世之人知有道而不得其道不知無仙而妄學一作求仙此我之所哀也道者自然之道也生而必死亦自然之理也以自然之道養自然之生不自戕賊天闕而盡其天年此自古聖智之所同也禹走天下乘四載治百川可謂勞其形矣而壽百年顏子蕭然坐於

陋巷簞食瓢飲外不誘於物內不動於心可謂至樂矣而年不及三十斯二人者皆古之仁人也勞

其形者長年安其樂者短命蓋命有有一長短稟

之於天非人力之所能爲也惟不自戕賊而各盡

其天年則二人所同也此所謂自然之道養自然

之生後世貪生之徒爲養生之術者無所不至至

茹草木服金石吸日月之精光又有以謂此外物

不足恃而反求諸內者於是息慮絕欲鍊精氣勤

吐納專於內守以養其神其術雖本於貪生及其

至也尙或可全形而却疾猶愈於肆欲稱情以害

其生者是謂養內之術故上智任之自然其次養內以却疾最下妄意以貪生世傳黃庭經者晉魏間道士養生之書也其說專於養內多奇怪故其傳之久則易爲訛舛今家家異本莫可考正無仙子旣甚好古家多集錄古書文字以爲翫好之娛有黃庭石本者乃永和十三年晉人所書其文頗簡以較今世俗所傳者獨爲有理於是喟然嘆曰吾欲曉世以無仙而止人之學者吾力顧未能也吾視世人執奇怪訛舛之書欲求生而反害其生者可不哀哉矧以我翫好之餘拯世人之謬惑何

惜而不爲故爲刪正諸家之異一以永和石本爲定其難曉之言略爲注解庶幾不爲訛謬之說惑世以害生是亦不爲無益若大雅君子則豈取於此

真誥十卷

龔氏曰梁陶弘景撰皆真人口授之誥故以爲名記許邁楊羲諸仙受授之說本七卷運題一象甄二命授三協昌期四稽神樞五握真輔六翼真檢七後人析第一第二第四各爲上下

朱子語錄曰道書中真誥末後有道授篇却是竊

佛家四十二章經爲之非特此也至如地獄託生
妄誕之說皆是竊他佛教中至鄙至陋者爲之某
嘗謂其徒曰自家有箇寶珠被他竊去了却不照
管亦都不知却去他墻根壁角竊得箇破瓶破罐
用此甚好笑

周易參同契三卷

鼂氏曰漢魏伯陽撰按神仙傳伯陽會稽上虞人
通貫詩律文辭贍博修真養志約周易作此書凡
九十篇徐氏箋注桓帝時以授同郡淳于叔通因
行於世彭曉爲之解隋唐書皆不載按唐陸德明

解易字云虞翔注參同契言字從日下月今此書
有日月爲易之文其爲古書明矣

參同契分章通真義三卷 明鏡圖訣一卷

陳氏曰真一子彭曉秀川撰蜀永康人也參同契
因易以言養生後世言修鍊者祖之序稱曉丁未
以參同契分十九章而爲之注且爲圖八環謂之
明鏡圖曩在麻姑山傳錄其本有秀川傳注綱會
稽所刻本其前題祠部員外郎彭曉蓋據祕閣本
云爾麻姑本附傳亦言仕蜀爲此官

張隨注參同契三卷

龍氏曰皇朝張隨皇祐中居青城山注魏伯陽之書列十數圖於其後

參同契大易圖一卷

龍氏曰不題撰人論水火候有太易太初太始太素太極四象五行等二十四篇并圖按崇文總目云張處撰而李獻臣以爲天老神君撰雲常子張處序亦名至藥丹訣未知孰是

參同契考異一卷

陳氏曰朱熹撰以其詞韻皆古與雅難通讀者淺聞妄輒更改比他書尤多舛誤合諸本更相讐正其諸同異皆並存之

朱子語錄曰參同契所言坎離水火龍虎鉛汞之屬只是互換其名其實只是精氣二者而已精水也坎也龍也汞也氣火也離也虎也鉛也其法以神運精氣結而爲丹陽氣在下初成水以火鍊之則凝神丹其說甚異內外異色如鴨子卵真箇成此物參同契文章極好蓋後漢之能文者爲之讀得亦不枉其用字皆根括古書非今人所能解以故皆爲人妄解世間本子極多其中有云千周祭彬彬兮萬遍將可覩神明或告人兮魂靈忽自悟

言誦之久則文義要訣自見又曰二用無爻位周
流行六虛二用者用九用六九六亦坎離也六虛
者卽乾坤之初二三四五上六爻位也言二用雖
無爻位而常周流乎乾坤六爻之間猶人之精氣
上下周流乎一身而無定所也世有龍虎經云在
參同契之先季通亦以爲好及得觀之不然乃隱
括參同契之語而爲之也

又曰參同契爲艱深之詞使人難曉其中有千周
萬遍之說欲令熟讀以得之也大槩其說以爲欲
明言之恐泄天機欲不說來却又可惜

金碧古文龍虎上經一卷

陳氏曰不著名氏麻姑所錄本無金碧字

朱子語錄曰曾景建謂參同契本是龍虎上經果
否先生曰不然蓋是後人見魏伯陽有龍虎上經
一句遂僞作此經大槩皆是體參同契而爲故其
間有說錯了處如參同契云二用無爻位周流行
六虛二用者卽易中用九用六也乾坤六爻上下
皆是有位惟用九用六無位故周流行於六虛今
龍虎經却錯說作虛危去蓋討頭不見胡亂牽合
一字來說

參同契解一卷

陳氏曰題紫陽先生不知何人

西昇經四卷

鼂氏曰題曰太上真人尹君記錄老子將遊西域
既爲關令尹喜說五千言又留祕旨凡三十六章
喜述之爲此經其首稱老君西昇聞道竺乾有古
先生是以就有道說者以古先生佛也事見廣洪
明集辯惑論

章注西昇經三卷

鼂氏曰梁道士章處元分上下經上經三七法天
之陽數分二十章下經四七法地之陰數總四十
九章象大衍用數云唐志稱處元集解以聞道竺
乾爲經道竺乾以古先生爲老子自謂

洞元注西昇經四卷

鼂氏曰唐洞元子注其姓名未詳唐志有戴詵注
西昇經疑此或詵書也分三十六章謂竺乾古先
生非釋迦之號云

徐注西昇經二卷

鼂氏曰徐道邈撰句曲人未詳何代其本以有古
先生善入無爲作善入泥丸古先生者吾之師也

化乎竺乾作吾之身也化胡竺乾云

步虛經一卷

鼂氏曰太極真人傳左仙翁其章皆高仙上聖朝元都玉京飛巡虛空之所諷詠故曰步虛

定觀經一卷

鼂氏曰題云天尊授左元真人述定心惠觀等修故以爲名云

內觀經一卷

鼂氏曰老子撰述人胞胎魂魄衆神之各當締觀身心俾不染濁穢乃可常存云凡二十二章

老子化胡經十卷

鼂氏曰魏明帝爲之序經言老子歸崑崙化胡次授罽賓後及天竺按裴松之三國志注言世稱老子西入流沙化胡成佛其說蓋起於此議化胡經八狀附於後唐志云萬歲通天元年僧惠澄上言乞毀老子化胡經秋官侍郎劉如璿等議狀證其非僞此是也

太清經一卷

鼂氏曰太清護命靈文金闕上聖按傳修道之士可以除邪治病云

天蓬神呪一卷

鼂氏曰未詳撰人邯鄲書目載道書最多已上八種皆有之

混元內外鑒二卷 延壽經一卷附

鼂氏曰混元謂老子也亦導引之術內篇外篇二太上說魂魄經二卷

鼂氏曰題曰老子撰載三魂七魄名字形狀好惡以呪術存制之

崇文題曰太上靈書李氏亦有其目

天真皇人九仙經一卷

鼂氏曰天皇人爲黃帝說一行羅公遠葉法靜注論水火龍虎造金丹之術崇文書也按九仙經興廢記云此經黃帝留峩眉山石壁漢武帝時得之大中嘗禁絕

陰符內丹經一卷

鼂氏曰題曰老子說

紫陽金碧經二卷

鼂氏曰皇元真人撰廣成子述河上公修爲六十四章上明和合習真之法中有調神理氣之方下有還丹九鼎上昇之術崇文目有三卷今逸其一

靈樞金鏡神景內經十卷

陳氏曰稱扁鵲注

上清天地宮府圖經二卷

陳氏曰唐司馬子微撰

中誠經一卷

陳氏曰稱黃帝赤松子問答蓋假托也

太上金碧經一卷

陳氏曰題魏伯陽注

四十九章經

李壁季章序曰隱者劉漫翁博涉古今尤邃黃老

一曰某言賈生惜誓賦之超絕如云黃鵠一舉兮
知山川紆曲再舉兮覩天地圓方此言居身益高
則所見益遠矣今人汨於情僞沉於利欲猶坎蛙
壤蚓積處窪下欲幾高明得乎東坡稱博大古真
人老聃關尹喜獨立萬物表長生乃餘事惟其翛
然元覽却立垢紛之外不爲物所梏則乘星載雲
揮斥八極超無有而獨有又誰禦哉漫翁曰君言
善矣然茲理也不待賈生東坡而始著是在道經
四十九章經已云學道甚苦如負重登山旣登絕
頂其苦自息俯視一世皆微眇也予始知有是經

亟從羽流訪得讀之慨然曰至言妙道盡在是矣
虛皇豈欺我哉大抵道家貴於眇萬物而不留離
澳渌而化昭融物之旦夜交於前者皆不足以爲
吾病而去道邇矣然而爲物而眇視之猶有物也
若盡空諸有豁然四達無門無旁無聲無臭直爲
至極而聖人之教人未嘗舉空也老子言道雖窈
冥恍惚而必有象有物焉此經所謂圓明具足者
非邪或謂之誠或謂之元或謂之真或謂之覺或
謂之實際以至爲情爲識爲喜爲怒爲愛爲惡爲
聖賢爲仙靈爲姦邪爲盜賊大而天下之能化育

微而蟻蠓之能飛鳴皆是物也故易著感寂之理
而昇元清靜二經雖曰空而實非空使凡世之善
惡皆可舉而空之則淫貪狠愚險伎讒媚所植罪
本亦可空矣則將何所不至乎味經之三十三章
蓋與老易及清靜昇元合雖稱種種因緣均爲幻
假當滅除之而他章顧謂觸情縱欲是造諸苦吾
道苦而後樂衆生樂而後苦又云財者罪之根聚
財爲聚孽又云危人還自危枉彼還自枉觀此則
凡姦邪小人聚財以規利枉彼以陷人雖快一時
終必自禍猶影響也槩謂之空可乎嘗怪道家言

三洞三太皆藏玉京上真猶不得見而近世張君
房所集道書凡四千五百六十五卷崇觀間增至
五千三百八十七卷抑何多邪黃老宗旨虛無至
太洞諸經昉言諸天奧密神仙隱祕事自晉始傳
人間由隋歷唐方伎符籙其說益以誕漫去本滋
遠以是知道家之書真者絕少而俗師附益假托
者多如世所傳斗經乃以北辰爲北斗豈有天人
至尊不辨星文誤引論語者乎若此經之元妙精
微明白切至其爲先聖至人所說無疑惟卓識殫
洽者無惑乎古書之正僞彼方士羽人苟非研精

教典獨會於心烏能斷其書之純駁哉
右神僊

文獻通考卷第二百二十四

文獻通考卷第二百二十五

鄱陽馬端臨貴與著

經籍考五十二

子神僊家

太平經一百七十卷

後漢書襄楷傳桓帝時楷上書言臣前上琅邪宮崇

受于吉神書不合明聽于姓吉名也神書即今道家

戊己庚辛壬癸為部每部一十七卷又言前者宮崇所獻神書專以奉

天地順五行為本亦有興國廣嗣之術其文易曉參

同經典而順帝不行故國允不興云云初順帝時琅

邪宮崇詣闕上其師于吉於曲陽泉水上所得神書百七十卷皆縹白素朱介青首朱目號太平清令書其言陰陽五行爲家而多巫覡雜語有司奏崇所上妖妄不經乃收藏之後張角頗有其書焉及靈帝卽位以楷書爲然

按道家之說皆昉於後漢桓帝之時今世所傳經典符籙以爲張道陵天師永壽年間受於老君者是也而太平經正出於此時范史所書甚明然隋以來藝文志道書中並不收入至宋中興史志方有之然以爲襄楷撰則非也今此經世所不見獨

章懷太子所注漢書畧及其一二如楷疏中所謂奉天地順五行者經中所言亦淺易無甚高論至所謂興國廣嗣之術則不過房中鄙褻之談耳楷好學博古於君昏政亂之時能詣闕上書明成瑨李雲之寃指常侍黃門之過不可謂非高明傑特之士而疏中獨再三尊信此書遂以來違背經誼假托神靈之効幾不免獄死惜哉然此經流傳最古卷帙最多故附見於此于吉者後爲孫策所殺按順帝至孫策據江東之時垂七十年而吉於順帝時已爲宮崇之師則必非稚齒度其死時當過

百歲必有長生久視之術然亦不能晦跡山林以全其天年而乃招集徒衆制作符水襲黃巾米賊之爲以取誅戮則亦不足稱也

登真隱訣二十五卷

鼂氏曰梁陶弘景撰景以學其訣者當由階而登真文多隱非訣莫登故以名書凡七篇十七條隋志云

抱朴子內篇二十卷

鼂氏曰晉葛洪撰洪字稚川丹陽句容人元帝時累召不起止羅浮山鍊丹著書推明飛昇之道導

養之理黃白之事三十卷二十卷名曰內篇十卷名曰外篇自號抱朴子因以命書

陳氏曰洪所著書內篇言神仙黃白變化之事外篇駁雜通釋此二十卷者內篇也館閣書目有外篇五十卷未見

玉皇聖胎神用訣一卷

鼂氏曰玉皇訣云野人郎肇注

無上祕要九十五卷

鼂氏曰題曰元始天尊說藝文志止七十二卷不知何時析出二十三通也

葛仙翁胎息術一卷

鼂氏曰仙翁葛洪也

太清服氣口訣一卷 太起經一卷 開氣法一卷

太上指南歌一卷

鼂氏曰四書皆題曰老子撰服氣訣也

導引養生圖一卷

鼂氏曰梁陶弘景撰分三十六勢如鴻鶴徘徊鴛鴦戢羽之類各繪像於其上田偉家本少八勢

大還丹契祕圖一卷

鼂氏曰草衣洞真子元撰凡三十章太還丹者乃

日月精氣所致也論火候則以朔望爲據記藥物則以鉛汞爲名云

太上墨子枕中記一卷

中興藝文志不知作者書載匿形幻化之術殆依託墨子云

金碧潛通一卷

鼂氏曰題長白山人元陽子解未詳何代人不著撰人名氏按邯鄲書目云羊參微集其序言本得之石函皆科斗文字世有三十六字訣七曜五行八卦九宮論還丹之事其辭多隱人莫測劉真人

演仰觀上象以定節度今之所作多不成者蓋不
得口訣故也吾恐墜匿聖文故著上經託號金碧
潛通金者剛柔得位火不能灼服之仙遊碧落雲
云疑卽參微所撰也道藏止收一卷

還丹歌一卷

鼂氏曰元陽子撰次序雜亂非完書也大旨解參
同契李氏書目云海客李元光遇元壽先生於中
岳授此未詳元光何代人

龍虎通元要訣一卷

鼂氏曰蘇元朗撰以古訣龍虎經參同契祕金碧

潛通訣其文繁而隱故纂其要爲是書李邯鄲家
本題云青霞子隋開皇時人不出名氏豈元朗之
號邪

易成子大丹訣一卷

鼂氏曰彭仲堪撰不著何代人字舜元天台遇一
異僧授此術論火候

青牛道士歌一卷

鼂氏曰題曰青牛道士未詳

八段錦一卷

鼂氏曰不題撰人吐故納新之訣也

高象先歌一卷

鼂氏曰高先撰象先其字也未詳何代人論參同契

真一子還丹金鑰一卷 太清大或經一卷 九天元

路祕論一卷 靈源銘一卷 太清爐鼎斤兩訣一卷

鼂氏曰五書不著撰人論龍虎鉛汞火候之術

神仙可學論一篇

鼂氏曰唐吳筠撰稽康謂神仙不可以學致筠意不以爲然故演修習之方以勉學仙之士云

坐忘論一卷

鼂氏曰唐司馬承禎子微撰凡七篇其後有文元公跋謂子微之所謂坐忘卽釋氏之言宴坐也

陳氏曰言坐忘安心之法凡七條并樞翼一卷以爲修道階次其論與釋氏相出入

天隱子一卷

鼂氏曰唐司馬子微爲之序天隱子不知何許人著書八篇修鍊形氣養和心靈歸根契於陰陽遺照齊乎莊叟殆非人間所能力學者也王古以天隱子卽子微也一本有三宮法附於後

陳氏曰司馬子微序言長生久視無出此書今觀

其言殆與坐忘論相表裏豈天隱云者托之別號歟

幽傳福善論一卷

陳氏曰唐孫思邈撰

元綱論一卷

陳氏曰唐中岳道士吳筠撰

日月元樞論一卷

鼂氏曰唐劉知古撰明皇朝爲綿州昌明令時詔求通丹藥之士知古謂神仙大藥無出參同契因著論上於朝

胎息祕訣一卷

鼂氏曰唐僧遵化撰論達磨胎息總十八篇歌二十三首凡一千四百四十言天祐丁丑書成

太白還丹篇一卷

陳氏曰稱清虛子太白山人唐貞元時

金丹訣一卷

鼂氏曰皇朝張瑾撰治平中授丹訣於榮中立後因叙其事以教後學

玉芝書三卷

鼂氏曰皇朝陳舉撰舉字子堙蘇州人

養生真訣一卷

陳氏曰虞部員外郎耿肱撰大中祥符時人

授道志一卷

鼂氏曰皇朝楊谷真宗朝嘗遇神仙成都藥市因授其道本李氏書日亦載云谷自號純粹子

通元祕要悟真篇一卷

鼂氏曰皇朝張用成撰用成字平叔天台人熙寧中隨陸師閔入蜀授道於隱者因成律詩八十一首

陳氏曰天台張伯端平叔撰一名用成熙寧遇異

人於成都所著五七言詩及西江月百篇末卷爲禪宗歌頌以謂學道之人不通性理獨修金丹則性命之道未全有葉士表袁公輔者各爲注凡五卷

養生丹訣一卷

鼂氏曰皇朝皇甫士安撰士安岷山道士也

歸正議九卷

鼂氏曰皇朝林靈素撰佛書中非道家者

太一真君固命歌一卷

中興藝文志題真人勒於羅浮山朱明洞陰谷壁古

篆文字東晉葛洪譯鮑靚行於世言房中術

靈樞道言發微二卷

陳氏曰朝議大夫致仕傅燮撰進專言火候

金液還丹圖一卷

陳氏曰不著名氏自稱元真蓋宣和道流也

還丹復命篇一卷

陳氏曰毗陵僧道光撰亦擬悟真詩篇靖康丙午
序

道樞二十卷

陳氏曰曾慥端伯撰慥自號至游子采諸家金丹

大藥修鍊般運之術爲百二十二篇初無所發明
獨黜採御之法以爲殘生害道云

肘後三成篇一卷

陳氏曰稱純陽子謂呂洞賓也其言小成七中成
六大成五皆導引吐納修煉之事又有金丹訣一
卷卽此書而微不同

太清養生上下篇二卷

陳氏曰稱赤松子甯先生

上清金碧篇一卷

陳氏曰稱煙蘿子

金虎鉛汞篇一卷

陳氏曰稱元君

鉛汞五行篇一卷

陳氏曰稱探元子

華陽真人祕訣一卷 呂真人血脉論一卷

陳氏曰前書稱施肩吾後書稱傅婁景先生

老子四象論一卷 道士柳冲用巨勝歌一卷 百章

集一卷

陳氏曰百章集稱魏伯陽

逍遙子通元書三卷 許先生十二時歌一卷 金鏡

九真玉書一卷

陳氏曰並不知姓名

黃帝丹訣玉函祕文一卷

陳氏曰文林郎蒲庚進

呂公審頭坯歌一卷

陳氏曰以陶器爲喻也

龍虎金液還丹通元論一卷

陳氏曰稱羅浮山蘇真人撰

金碧上經古文龍虎傳

陳氏曰長白山人元陽子注皆莫知何人已上十

八種共爲一集其中有龍牙頌及天隱子各見釋氏道家類

羣仙珠玉集一卷

陳氏曰其序曰西華真人以金丹刀圭之訣傳張平叔作悟真篇以傳石得之薛道光陳泥丸至白玉蟾玉蟾者葛其姓福之閩清人嘗得罪亡命蓋姦妄流也余宰南城有寓公稱其人云近嘗過此識之否余言不識也此輩何可使及吾門李士寧張懷素之徒皆殷監也是以君子惡異端

列仙傳二卷

陳氏曰漢劉向撰凡七十二人每傳有贊似非向撰西漢人文章不爾也館閣書目三卷六十二人崇文總目作二卷七十二人與此合

神仙傳十卷

鼂氏曰晉葛洪弟子滕升嘗問洪曰古人之仙者豈有其人乎洪答以秦阮倉所記有數百人劉向所纂又七十一人今後錄集古之仙者以傳真識之士云

續仙傳三卷

陳氏曰唐溧水令沈汾撰或作玠

仙苑編珠二卷

鼂氏曰唐王松年撰取阮倉劉向葛洪所傳神仙又取經記中梁以後神仙百二十八人比事屬辭効蒙求體爲是書

道教靈驗記二十卷

陳氏曰蜀道士杜光庭撰

王氏神仙傳四卷

鼂氏曰蜀杜光庭纂光庭集王氏男真女仙五十五人以諂王建又有王虛中續纂二十人附其後陳氏曰當王氏有國時爲此書以媚之謂光庭有

道吾不信也

西山羣仙會真記五卷

陳氏曰九江施肩吾希聖撰唐有施肩吾能詩元和進士也而曾慥集仙傳稱呂巖之後有施肩吾撰會真記蓋別是一人也

鼂氏曰言煉養形氣補毓精神成內丹之法凡三十五篇

鍾呂傳道記三卷

陳氏曰施肩吾撰叙鍾離權雲房呂巖洞賓傳授論議

降聖記五十卷

鼂氏曰皇朝丁謂撰大中祥符五年十月十七日聖祖降七年謂請編次事跡詔李維宋綬晏殊同編天禧元年上之

先天記三十六卷

鼂氏曰皇朝王欽若集聖祖趙諱卽軒轅黃帝也故欽若奉詔編次傳記黃帝事迹上之賜名先天記御製序冠其首

集仙傳十二卷

陳氏曰曾慥撰自岑道願而下一百六十二人

雲笈七籤一百二十卷

鼂氏曰皇朝張君房等纂君房祥符中謫官寧海時聖祖降朝廷盡以祕閣道書付杭州俾戚綸陳堯臣校正綸等同王欽若薦君房專其事君房銓次得四千五百六十五卷於是掇其蕙奧總萬餘條成是書仁宗時上之

陳氏曰凡經法符籙修養服食以及傳記無不畢錄項於莆中傳錄纔二冊蓋節本也後於平江天慶觀道藏得其全錄之

道藏書目一卷

龍氏曰皇朝鄧自和撰大洞真部八十一秩靈寶
洞元部九十秩太上洞部三十秩太真部九十六
秩太平部一十六秩正一部三十九秩凡六部三
百一十一秩

龍氏曰序九流者以謂皆出於先王之官咸有所
長及失其傳故各有弊非道本然特學者之過也
是以錄之又有醫卜技藝亦先王之所不廢故附
於九流之末夫儒墨名法先王之教醫卜技藝先
王之政其相附近也固宜昔劉歆既錄神仙之書
而王儉又錄釋氏今亦其循之者何哉自漢以後

九流寢微隋唐之間又尚辭章不復問義理之實
雖以儒自名者亦不知何等爲儒術矣况其次者
哉百家壅底正塗之弊雖息而神仙服食之說盛
釋氏因果之教興雜然與儒者抗衡而意常先之
君子雖有取焉而學之者不爲其所誤者鮮矣則
爲患又甚於漢蓋彼八家皆有補於時而此二教
皆無意於世也八家本出於聖人有補於時特學
者失之而莊老猶足以亡晉申商猶足以滅秦况
二教無意於世不自附於聖人若學而又失之則
其禍將如何故存之以爲世戒云

東坡蘇氏上清儲祥宮碑曰臣謹按道家者流本出於黃帝老子其道以清靜無爲爲宗以虛無應物爲用以慈儉不爭爲行合於周易何思何慮論語仁者靜壽之說如是而已自秦漢以來始用方士言乃有飛昇變化之術黃庭大洞之法太上天真木公金母之號延康赤明龍漢開皇之紀天皇太一紫微北極之祀下至於丹藥奇技符籙小數皆歸於道家學者不能必其有無然臣竊論之黃帝老子道之本也方士之言末也

后山陳氏曰白鶴觀記曰漢兩劉校中書爲七畧其叙方技則有神仙諸子則有道家而老莊並焉天地神祇三靈百神又皆出於禮官而今之爲道者合而有之益以符咒法籙捕使鬼物皆老氏所不道也

致堂胡氏曰三教之名自其徒失本真而云然其繆悠之甚者道家是也儒以名學仁義道德之人自周有之然非一定之美稱也故孔子曰女爲君子儒無爲小人儒學仁義道德不失其正君子儒也其極則莊周所謂魯國一人者也學仁義道德而失其正小人儒也其極則莊周所謂詩禮發冢

者也佛者浮屠所謂覺也爲其道而覺號之曰佛則瞿曇之徒是也若夫道則以天下共由而得名猶道路然何適而非道哉得道而盡惟堯舜文王孔子而已黃帝之言無傳矣老聃八十一篇槩之孔業固難以大成歸之自其所見而立言不可與天下共由也獨善其身不可與天下共由而名之曰道此漢以來淺儒之論以啓後人枝流分裂之弊豈可用也至其後不復宗八十一篇之旨而從方士言乃有飛仙變化之術丹藥符籙之技禱祈醮祭之法沉淪鬼獄之論雜然並興皆歸於道家

者流世人從事於此者皆曰奉道奉道意以道爲混淪元妙有主有知能與人興禍作福之一物也豈不遠哉佛氏固邪說然所論虛實並行若其三身雖曰寓意而實有是三人焉道家惟老聃者周柱下史也其元始太上則無是人也無是人則何所象類無乃邪誕之甚歟至其經論科儀等事又依倣佛氏而不及者自杜光庭爲之黃冠師資參養口體逃避稅役士大夫習而不察和其所倡不亦惑哉故因武宗道門先生之命而遂言之彼趙歸真者寧有他長必以殘生左道熒惑人主故敬

武皆餌丹躁渴以殞天年如太宗之婆娑寤寐憲宗之柳泌盡此類也苟以吹噓呼吸已疾引年則司馬承禎軒轅集之徒安肯舍萬乘所問而去之哉武宗曰宮中無事與之談道滌煩此以清虛之趣蓋其非僻之爲也人主惟寡欲則邪說無自而入矣

按道家之術雜而多端先儒之論備矣蓋清淨一說也煉養一說也服食又一說也符籙又一說也經典科教又一說也黃帝老子列禦寇莊周之書所言者清淨無爲而已而畧及煉養之事服食以

下所不道也至赤松子魏伯陽之徒則言煉養而不言清靜盧生李少君欒大之徒則言服食而不言煉養張道陵寇謙之之徒則言符籙而俱不言煉養服食至杜光庭而下以及近世黃冠師之徒則專言經典科教所謂符籙者特其教中一事於是不惟清淨無爲之說畧不能知其旨趣雖所謂煉養服食之書亦未嘗過而問焉矣然俱欲昌以老氏爲之宗主而行其教蓋嘗卽是數說者而詳其是非如清淨無爲之言曹相國李文靖師其意而不擾則足以致治何晏王衍樂其誕而自肆則

足以致亂蓋得失相半者也煉養之說歐陽文忠公嘗刪正黃庭朱文公嘗稱參同契二公大儒攘斥異端不遺餘力獨不以其說爲非山林獨善之士以此養生全年固未嘗得罪於名教也至於經典科教之說盡鄙淺之言庸黃冠以此逐食常欲與釋子抗衡而其說較釋氏不能三之一爲世患蠹未爲甚鉅也獨服食符籙二家其說本邪僻謬悠而惑之者罹禍不淺樂大李少君子吉張津之徒以此殺其身柳泌趙歸真之徒以此禍人而卒自嬰其戮張角孫恩呂用之之徒遂以此敗人天下國家然則柱史五千言曷嘗有是乎蓋愈遠而愈失其真矣

朱文公嘗言佛家偷得老子好處後來道家只偷得佛家不好處譬如道家有箇寶藏被佛家偷去後來道家却只取得佛道瓦礫殊可笑愚嘗因是說而推究之仁義禮法者聖賢之說也老氏以爲不足爲而主於清靜清淨無爲者老氏之說也佛氏以爲不足爲而主於寂滅蓋清靜者求以超出乎仁義禮法而寂滅者又求以超出乎清靜無爲者也然曰寂滅而已則不足以垂世立教於是緣

業之說因果之說六根六塵四大十二緣生之說層見疊出宏遠微妙然推其所自實本老子高虛元妙之旨增而高之鑿而深之遂自成一家之言而後來之道經反從而依倣之然較其詞采則鄙劣彌甚者蓋瞿曇設教最久囑付其徒亦甚至又能鼓舞天下之文人才士以羽翼之推原其旨意之所從來而潤色其辭語之所未備故其爲書博大奇偉不可以淺窺若老子則其初固未嘗欲以道德五千言設教也羽人方士借其名以自重而實不能知其說於是就佛經脚跟下竊其緒餘作

諸經懺而復無羽翼潤色之者故無足觀蓋佛襲老之精微沂而上之其說愈精微道襲佛之粗淺沿而下之其說愈粗淺矣然此論其蘊奧也今之黃冠釋子俱未嘗究竟至此而特以其科教之所謂濟生度死希求福利者行於世而舉世宗之莫敢有異說愚嘗論之二教所謂濟拔幽途者俱妄也不足復議至於祈求以希福之說雖達生知命者所不爲然以理觀之則道教爲優何也蓋人受生於天地稟氣於陰陽五行日月星辰實照臨之山川神祇實擁護之則夫疾痛而呼籲厄難而叩

祈首過雪愆祈恩請福而天地明神鑒其懇誠爲之悔禍降祥則亦理之所有雖曰道經中所謂天神地祇皆領之國家之祠官爲臣庶者不當僭有所祈然子路曰禱爾於上下神祇孟子曰雖有惡人齋戒沐浴則可事上帝則亦爲臣庶而言且古今異宜禮亦因時而以義起古者士惟一廟今士庶莫不祀其高曾古者支子不祭今無有不祀其先者古者有喪不祭今亦不然先儒講論及此固未嘗病其僭瀆而必欲復古之禮制也則夫臣庶士民之家苟有災厄而爲之祈籲天地醮祭星辰

黃冠師者齋明盛服露香叩首達其誠悃乃古者祝史巫覡薦信鬼神之遺意蓋理之所有而亦人情之所不能免也至以三清爲三炁五方爲五炁九天爲九炁雖不能必其有無然其說亦通特不當指太清爲老子蓋務尊其師而反流於僭妄耳釋流見道家科教之有是說也乃從而効之以其所謂諸佛菩薩者美其名曰無量壽曰消災熾盛曰救苦救難而以爲所求必得所禱必應且佛氏所謂悲閔衆生而爲之導師者不過欲其脫離三業而躋之十地除去無明而納之眞如懺悔於旣

往覺悟於方來以共成佛道耳禍福之司非其任也彼方以空寂爲賢則豈復預災祥吉凶之事以色相爲妄則豈復歆供養香乳之奉乃盛作莊嚴僕僕亟拜以希福利不亦踈乎然則二氏固互相倣倣者也理致之見於經典者釋氏爲優道家強欲效之則祇見其敷淺無味祈禱之具於科教者道家爲優釋氏強欲效之則祇見其荒誕不切矣

文獻通考卷一百二十五



